

MESYUARAT KEDUA, PENGGAL PERTAMA
PARLIMEN KEEMPAT BELAS
2018

HARI ISNIN : 26 NOVEMBER 2018

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGKAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : DATO' NGEH KOO NAM
[BERUAS]
TARIKH : 26 NOVEMBER 2018 (ISNIN)

SOALAN NO. 1

Minta **MENTERI PERTANIAN DAN INDUSTRI ASAS TANI** menyatakan rasional peruntukan Seksyen 52 Akta Perikanan 1985 yang memastikan pihak Mahkamah melucutkan (*forfeited*) vesel jika terdapat kesalahan yang dinyatakan dalam seksyen tersebut. Adakah Kerajaan bercadang memberikan budi bicara kepada mahkamah untuk memutuskan penalti yang dikenakan kerana setiap kes mempunyai fakta tersendiri.

JAWAPAN

Yang di-Pertua,

Untuk makluman Ahli Berhormat, Seksyen 52 Akta Perikanan 1985 telah jelas memperuntukkan secara mandatori bahawa mahkamah *shall* atau hendaklah melucutkan (*forfeited*) vesel serta kelengkapan dan ikan-ikan yang ditangkap seperti dinyatakan dalam Seksyen 52 (i) dan (ii) jika disabit melakukan kesalahan mengikut Seksyen 52 (1) (a) dan (b) Akta Perikanan 1985.

Penetapan penalti atau hukuman lucut hak yang dikenakan adalah wajar berdasarkan kepada justifikasi berikut:

- (i) Pencerobohan haram oleh vesel-vesel penangkapan ikan asing sangat berleluasa dan rekod tangkapan vesel asing yang dijalankan oleh APMM tidak menunjukkan tren penurunan;
- (ii) Kes pendakwaan mahkamah bagi vesel-vesel tempatan hanya dibuat sekiranya melibatkan kesalahan kali ke-4, menangkap ikan tanpa lesen vesel dan peralatan serta menggunakan peralatan menangkap ikan yang dilarang sahaja; dan
- (iii) Kemerosotan sumber perikanan yang serius akibat daripada eksploitasi sumber perikanan yang berlebihan.

Sehubungan itu, Kementerian tidak bercadang untuk memberikan budi bicara kepada mahkamah untuk memutuskan penalti yang akan dikenakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. NORAINI AHMAD
[PARIT SULONG]**

TARIKH : 26 NOVEMBER 2018 (ISNIN)

SOALAN NO. 2

Minta **MENTERI PENDIDIKAN** menyatakan apakah mekanisme yang digunakan oleh Kementerian dalam pemilihan sekolah yang melaksanakan program Dual Language Programme (DLP) yang dilaksanakan bagi meningkatkan penguasaan bahasa Inggeris dalam mata pelajaran Sains dan Matematik dan apakah impak program kepada sekolah jika sekolah yang dipilih melaksanakan DLP adalah merupakan dari kelompok sekolah yang cemerlang penguasaan Bahasa Inggerisnya.

JAWAPAN

Tuan Yang di-Pertua,

Dual Language Programme (DLP) adalah satu program pengukuhan bahasa Inggeris berasaskan pilihan sekolah di bawah Dasar Memartabatkan Bahasa Malaysia Memperkukuhkan Bahasa Inggeris (MBMMBI). DLP memberi pilihan kepada sekolah-sekolah yang memenuhi kriteria untuk mengadakan sesi pengajaran dan pembelajaran Bahasa Inggeris selain daripada Bahasa Melayu bagi mata pelajaran Matematik dan Sains. Sekolah yang berhasrat untuk melaksanakan DLP perlu memenuhi empat (4) kriteria iaitu sumber yang mencukupi; kesediaan pengetua/guru besar dan guru, peralatan, buku teks, bilik darjah; permintaan dan sokongan daripada ibu bapa;

dan pencapaian sekolah di dalam mata pelajaran Bahasa Melayu. DLP terbuka kepada semua sekolah termasuk di luar bandar dan tidak terhad kepada sekolah yang cemerlang dalam Bahasa Inggeris.

Pada tahun 2017, Kementerian Pendidikan Malaysia (KPM) telah membuat pemantauan pencapaian murid DLP dalam dua fasa. Fasa 1 melibatkan perbandingan antara pencapaian murid dalam peperiksaan mata pelajaran Bahasa Inggeris akhir tahun 2016 (*Take-off Value*) dengan pencapaian murid dalam peperiksaan mata pelajaran Bahasa Inggeris pertengahan tahun 2017 (*Operational Targeted Results: OTR*). Hasilnya, seramai 36.28 peratus murid sekolah rendah menunjukkan peningkatan dalam keputusan Bahasa Inggeris manakala untuk sekolah menengah 46.44 peratus murid telah menunjukkan peningkatan.

Fasa 2 melibatkan perbandingan antara pencapaian murid dalam mata pelajaran Bahasa Inggeris pertengahan tahun 2017 (OTR) dengan peperiksaan akhir tahun 2017 (*Expected Targeted Result: ETR*) bagi mengesan pencapaian murid dalam mata pelajaran Bahasa Inggeris untuk tahun semasa. Hasil daripada perbandingan tersebut, didapati seramai 55.82 peratus murid sekolah rendah dan 57.23 peratus murid sekolah menengah telah menunjukkan peningkatan dalam mata pelajaran Bahasa Inggeris.

Untuk makluman Ahli Yang Berhormat, berkesinambungan daripada pemantauan tersebut, KPM sedang menjalankan kajian Impak DLP yang lebih komprehensif. Dapatan kajian dijangka akan diperolehi dan dibentangkan pada Januari 2019.

Sekian, terima kasih.

RJM115

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB DR. AZMAN BIN ISMAIL

TARIKH : 26 NOVEMBER 2018

SOALAN :

Dr. Azman bin Ismail [Kuala Kedah] minta **MENTERI SUMBER MANUSIA** menyatakan pendirian Kerajaan dalam isu pekerja asing di sektor ladang kerana ladang-ladang kelapa sawit ketika ini mengalami kekurangan pekerja yang kritikal.

PR-1412-L01467

JAWAPAN:

Tuan Yang di-Pertua,

1. Untuk makluman Ahli Yang Berhormat, dasar semasa Kerajaan mengenai penggajian pekerja ialah memberi keutamaan pekerjaan kepada rakyat tempatan. Kerajaan sentiasa berusaha untuk memastikan pekerja tempatan tidak dinafikan hak mereka untuk bekerja di dalam sektor-sektor yang dibenarkan untuk menggajikan pekerja asing. Hanya jawatan-jawatan yang tidak dapat diisi oleh pekerja tempatan dalam sektor-sektor yang diluluskan sahaja dibenarkan untuk menggaji pekerja asing.

2. Pada 29 Ogos 2018, Kerajaan telah bersetuju memberi kelonggaran bagi melanjutkan tempoh kebenaran bekerja kepada pekerja asing yang memegang Pas Lawatan Kerja Sementara (PLKS) dan telah mencapai tahun penggajian ke-10. Kadar levi sebanyak RM10,000 setahun bagi setiap pekerja asing akan dikenakan serta ditanggung oleh majikan dan hanya dilaksanakan ke atas pekerja asing dalam sektor formal yang dibenarkan sahaja iaitu perkilangan, pembinaan, perladangan, perkhidmatan, pertanian serta perlombongan dan kuari tidak termasuk sektor yang dibekukan dan syarikat-syarikat penyumberluaran. Ini bagi membolehkan majikan mengekalkan pekerja asing mereka yang telah pun mempunyai kemahiran.

3. Walau bagaimanapun, kebenaran pelanjutan tempoh hanya terhad kepada maksimum tiga (3) tahun sahaja dan diperbaharui pada setiap tahun. Pekerja asing berkenaan tidak layak memohon Permit Masuk atau taraf Pemastautin Tetap dan kewarganegaraan Malaysia. Pelanjutan tempoh kebenaran bekerja kepada pekerja asing yang memegang Pas Lawatan Kerja Sementara (PLKS) dilaksanakan mulai 1 Oktober 2018.

4. Kerajaan menyedari akan kekurangan pekerja yang dihadapi oleh sektor perladangan dan pertanian. Justeru, dalam pembentangan Bajet 2019 oleh YB. Menteri Kewangan pada 2 November 2018 yang lalu, telah mengumumkan bahawa Kerajaan akan membantu sektor pertanian dan perladangan dengan mengurangkan levi lanjutan daripada RM10,000 kepada RM3,500 setahun untuk pekerja asing yang telah berkhidmat selama 10 tahun.

5. Berdasarkan rekod Jabatan Imigresen Malaysia sehingga 31 Oktober 2018, jumlah pekerja asing yang di rekod dan dikeluarkan Pas Lawatan Kerja Sementara (PLKS) adalah seramai 1,948,457 orang termasuk 280,509 orang pekerja asing bersamaan dengan 14.4% dalam sektor perladangan. Pecahan pekerja asing dalam sektor perladangan mengikut warganegara adalah seperti berikut:

Pecahan pekerja asing dalam sektor perladangan mengikut warganegara

Bil.	Warganegara	Jumlah (Sektor Perladangan)
1.	Indonesia	203,112
2.	Bangladesh	35,938
3.	Nepal	3,141
4.	India	27,640
5.	Myanmar	891
6.	Pakistan	5,636
7.	Filipina	3,169
8.	Vietnam	49
9.	China	12
10.	Thailand	642
11.	Sri Lanka	187
12.	Cambodia	92
	JUMLAH KESELURUHAN	280,509

6. Selain daripada tindakan-tindakan yang diambil oleh Kerajaan, pihak majikan juga wajar mengambil langkah-langkah agresif untuk mengurangkan kebergantungan kepada pekerja asing. Majikan hendaklah beralih kepada industri berasaskan automasi dan mekanisasi serta tidak lagi tertumpu kepada industri berasaskan buruh (*labour intensive*). Majikan juga mestilah tumpu kepada

pelbagai inisiatif ke arah menuju kepada *Industrial Revolution* 4.0 (IR 4.0) seperti *artificial intelligence*. Jenis-jenis pekerjaan bersifat 3D (*Dirty, Dangerous and Difficult*) hendaklah dikaji semula dan dikurangkan kerana jenis pekerjaan ini kebanyakannya diisi oleh pekerja asing.

7. Untuk makluman Ahli Yang Berhormat, Kerajaan juga telah menubuhkan Jawatankuasa Bebas bagi mengkaji pengurusan pekerja asing di Malaysia dan menjalankan kajian levi pelbagai peringkat untuk dilaksanakan kelak.

8. Kesimpulannya, Kerajaan sememangnya sentiasa memastikan pekerja tempatan diberi keutamaan dalam peluang pekerjaan dan pada masa yang sama, Kerajaan juga sedang meneliti pelbagai aspek dalam pengurusan pengambilan pekerja asing secara holistik supaya lebih sistematik dan berintegriti.

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : YB Dato' Sri Azalina Othman Said
[Pengerang]**

TARIKH : 26 November 2018 (Isnin)

SOALAN : 4

Dato' Sri Azalina Othman Said [Pengerang] minta **PERDANA MENTERI** menyatakan apakah perkembangan berkaitan dengan perluasan Mahkamah Jenayah Seksual Terhadap Kanak-Kanak diperluaskan secara berperingkat ke seluruh negeri di Malaysia untuk menyelesaikan dan melupuskan kes jenayah seksual terhadap kanak-kanak di Malaysia dengan adil dan cepat dan apakah punca kelewatan memperluaskan ke Mahkamah ini ke negeri-negeri yang lain.

JAWAPAN: YB TUAN MOHAMED HANIPA MAIDIN,

TIMBALAN MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, Mahkamah Jenayah Seksual Terhadap Kanak-Kanak yang pertama telah dibuka di Putrajaya dan mula beroperasi pada 23 Jun 2017 untuk mendengar dan memutuskan kes-kes jenayah seksual terhadap kanak-kanak dalam daerah Shah Alam, Petaling Jaya, Wilayah Persekutuan Kuala Lumpur dan Wilayah Persekutuan Putrajaya.

Selaras dengan peluasan mahkamah ini yang dibuat secara berperingkat, pada April 2018 Mahkamah Sesyen Jenayah Seksual Terhadap Kanak-Kanak di Kuching Sarawak telah disiapkan dan mula beroperasi. Selanjutnya peluasan ini sedang giat dijalankan di mana ubah suai Bilik Saksi Kanak-Kanak telah disiapkan sepenuhnya di kesemua Mahkamah negeri iaitu di Mahkamah Seremban, Mahkamah Melaka, Mahkamah Pulau Pinang, Mahkamah Kuantan, Mahkamah Ipoh, Mahkamah Kuala Terengganu, Mahkamah Klang, Mahkamah Johor Bahru dan Mahkamah Alor Setar. Dijangkakan kesemua Mahkamah ini akan dapat digunakan sebaik sahaja perolehan bagi peralatan ICT (kelengkapan *Court Recording Transmission*) dapat diselesaikan pada tahun 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATIN PADUKA DR. TAN YEE KEW
[WANGSA MAJU]
TARIKH : 26 NOVEMBER 2018 (ISNIN)

SOALAN NO. 5

Y.B. DATIN PADUKA DR. TAN YEE KEW [WANGSA MAJU] minta **MENTERI KEWANGAN** menyatakan langkah-langkah membanteras kegiatan pertukaran wang dan kiriman wang haram di negara ini. Adakah Kementerian akan membuat pengesahan maklumat pemilikan bagi semua pemegang entiti yang sah.

JAWAPAN

Tuan Yang di-Pertua,

Untuk makluman Ahli Yang Berhormat, di bawah Akta Perniagaan Perkhidmatan Wang 2011 (APPW), aktiviti perniagaan perkhidmatan wang (iaitu perniagaan pengurusan wang dan pengiriman wang) tidak berlesen merupakan suatu kesalahan dan jika disabitkan kesalahan boleh didenda sehingga lima juta ringgit atau dipenjarakan sehingga 10 tahun atau kedua-duanya sekali. Di samping itu, kesalahan di atas juga boleh disiasat di bawah seksyen 4(1) Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 (AMLA) sebagai satu kesalahan berat pengubahan wang haram seperti yang disenaraikan di bawah Jadual Kedua AMLA. Jika disabitkan kesalahan, pesalah boleh dikenakan denda tidak kurang lima kali ganda jumlah atau nilai hasil daripada aktiviti haram atau peralatan kesalahan itu pada masa kesalahan dilakukan atau lima juta ringgit, yang mana lebih tinggi, dan juga boleh dipenjarakan selama tempoh tidak melebihi 15 tahun.

Tuan Yang di-Pertua,

Penemuan oleh Global Financial Integrity (GFI) baru-baru ini juga telah meletakkan Malaysia pada kedudukan 10 teratas di kalangan negara-negara membangun dengan jumlah terbesar aliran wang keluar secara haram bagi tempoh 2005 hingga 2014 sebanyak USD 444.6 bilion. Penemuan GFI ke atas aliran wang haram dari Malaysia boleh memburukkan persepsi awam terhadap rasuah dalam negara. Punca utama aliran wang haram dari Malaysia adalah seperti berikut:

- Pelarian cukai pendapatan;
- Pelarian cukai dan duti kastam;
- Penyeludupan barang larangan;
- Pengaliran keluar tunai secara haram; dan
- Penyalahgunaan subsidi barangan

Salah satu langkah yang telah dan sedang diambil untuk memerangi semua ancaman tersebut di peringkat nasional adalah dengan memastikan bahawa

NO SOALAN : 5

ada sesuatu pasukan secara berkordinasi supaya dapat mengesan dan juga bertindak ke atas mereka yang menjalankan aktiviti haram dengan penyelerasan dan permuafakatan yang lebih efektif di kalangan pihak penguatkuasa undang-undang. Ia dapat meningkatkan hasil dan juga melarang tindakan atau kegiatan yang salah itu.

Selain itu, dalam membanteras aktiviti perniagaan perkhidmatan wang haram dan tidak sah, Bank Negara Malaysia (BNM) menjalankan aktiviti pengawasan (*surveillance*) secara berterusan untuk mengenal pasti pengendali yang tidak berlesen supaya tindakan penguatkuasaan yang sewajarnya boleh diambil ke atas mereka. BNM juga telah berusaha memperkukuh keupayaan memantau aktiviti di dalam industri dan mengenal pasti risiko dengan mengguna pakai analisis data (*data analytics*) bermula pada tahun 2017.

Dengan penggunaan sistem dan perisian khusus, serta membuat rumusan dan ramalan untuk sisastan lanjut dapat dibuat terhadap suatu kesalahan aktiviti perniagaan perkhidmatan wang dan membolehkan BNM menjalankan penyiasatan yang lebih berkesan ke atas aktiviti yang mencurigakan. Langkah untuk meningkatkan keberkesanan penguatkuasaan juga sedang diambil melalui penambahbaikan terhadap akta tersebut yang bertujuan untuk memastikan tindakan penguatkuasaan yang lebih cekap dan punitif dalam mencegah aktiviti perniagaan perkhidmatan wang yang tidak sah.

Setakat akhir bulan September 2018, hasil daripada tindakan penguatkuasaan jenayah yang telah diambil oleh BNM, 62 kes telah disabitkan kesalahan, 30 pendakwaan masih dalam peringkat perbicaraan sementara 37 kes sedang dalam penyiasatan. Di samping itu, sebanyak 15 perintah mahkamah sivil telah dikeluarkan untuk menghentikan aktiviti haram terhadap pesalah yang menjalankan perniagaan perkhidmatan wang tanpa lesen. Maklumat mengenai pesalah yang dikenakan tindakan juga dipaparkan melalui laman sesawang BNM dalam halaman '*Consumer Alert & Updates*' dan '*Financial Fraud Alert*' sebagai rujukan orang ramai.

Orang ramai juga boleh memuat turun aplikasi mudah alih '*My BNM*' untuk mengakses maklumat tersebut dengan merujuk '*Fraud Watch List*'. Pada masa yang sama, usaha berterusan juga sentiasa diambil untuk mempertingkatkan tahap kesedaran orang ramai mengenai penggunaan saluran yang sah. Ini termasuk keperluan untuk menghendaki peserta industri mempamerkan logo

NO SOALAN : 5

keahlian Persatuan Perniagaan Perkhidmatan Wang Malaysia di setiap premis bagi memudahkan orang awam mengenal pasti pengendali perkhidmatan perniagaan wang yang berlesen. Pengguna juga boleh memuat turun aplikasi mudah alih baharu iaitu '*MSB Advisor*', untuk mengakses maklumat lokasi pengendali perkhidmatan perniagaan wang yang berlesen, membandingkan harga, membuat penilaian atau aduan mengenai perkhidmatan yang disediakan, serta melaporkan aktiviti perkhidmatan perniagaan wang yang tidak sah. Seperti yang diperuntukkan di bawah APPW, senarai pemegang lesen perniagaan perkhidmatan wang disiarkan dalam Warta (*Gazette*) untuk maklumat orang ramai. Pengguna juga boleh mengakses laman sesawang BNM bagi mendapatkan maklumat pengendali perniagaan perkhidmatan wang yang berlesen.

SOALAN (6)

PEMBERITAHUAN PERTANYAAN DEWAN RAKYAT, PARLIMEN MALAYSIA

PERTANYAAN : LISAN

TARIKH : 26 NOVEMBER 2018
[ISNIN]

DARIPADA : YB DATO' HAJI CHE ABDULLAH BIN MAT
NAWI [TUMPAT]

SOALAN NO.6:

YB Dato' Haji Che Abdullah bin Mat Nawi [Tumpat] minta **MENTERI HAL EHWAL EKONOMI** menyatakan langkah-langkah mengurangkan jurang ekonomi, pembangunan dan kemudahan asas di negeri-negeri Pantai Barat dengan negeri-negeri Pantai Timur seperti Kelantan dan Terengganu.

JAWAPAN :-

Tuan Yang di-Pertua,

Saya memohon izin untuk menjawab soalan ini bersama-sama dengan soalan daripada Tan Sri Datuk Seri Panglima Haji Annuar bin Haji Musa [Ketereh] pada 28 November 2018 kerana kedua-dua soalan ini mempunyai maksud yang serupa.

Tuan Yang di-Pertua,

Untuk makluman Yang Berhormat, Kerajaan akan memberi tumpuan terhadap pembangunan di seluruh negara dan komited dalam menyediakan prasarana yang lengkap bagi memberikan kualiti hidup dan kesejahteraan yang lebih baik kepada semua rakyat di negara ini, termasuklah di negeri-negeri Pantai Timur.

Maka disebabkan itulah, Kerajaan Persekutuan dalam Kajian Separuh Penggal, Rancangan Malaysia Kesebelas (KSP RMKe-11) telah turut memberi penekanan penting dalam usaha merapatkan jurang pembangunan di antara wilayah merentas semua negeri. Berkaitan ini, Tonggak Ke-3 KSP RMKe-11, iaitu Menuju ke arah Pembangunan Wilayah yang Seimbang telah mengenalpasti bidang keutamaan dan strategi untuk mengurangkan ketidakseimbangan antara wilayah dan negeri. Ini bagi memastikan pengagihan manfaat sosioekonomi yang lebih baik bagi menggalakkan pertumbuhan saksama dan meningkatkan kesejahteraan rakyat, termasuk penduduk di negeri-negeri Pantai Timur.

Kerajaan telah mengenalpasti tiga bidang keutamaan sebagai usaha ke arah pembangunan wilayah yang seimbang sepertimana dinyatakan. Dua daripada tiga bidang keutamaan adalah berkait rapat dengan pertanyaan Yang Berhormat:

- (i) Memperkukuh pembangunan ekonomi wilayah; dan
- (ii) Merapatkan jurang pembangunan antara bandar dan luar bandar

Strategi pertama di bawah bidang keutamaan memperkukuh pembangunan ekonomi wilayah, iaitu memperkukuh dan memperkemas perancangan pembangunan negeri akan direalisasikan melalui beberapa inisiatif.

1. Menyediakan rangka kerja pembangunan wilayah bersepadu

- Kajian akan dijalankan untuk memperkemas dasar, pelan induk dan strategi supaya sejajar dengan perancangan spatial negara. Rangka kerja ini akan memastikan penyelarasan dan perancangan pelaksanaan pembangunan yang lebih baik.

2. Memastikan pengagihan peruntukan pembangunan yang lebih baik kepada negeri kurang membangun

- Peruntukan pembangunan Kerajaan akan diagih secara lebih baik dengan keutamaan diberi kepada enam negeri yang kurang membangun termasuk negeri-negeri Pantai Timur. Di bawah RMKe-11, negeri Pahang, Kelantan dan Terengganu telah pun menerima peruntukan sebanyak RM13.6 billion atau 9.9% daripada jumlah peruntukan pembangunan.

Tuan Yang di-Pertua,

Di bawah strategi kedua, iaitu memoden dan mempelbagai asas ekonomi, inisiatif yang akan dilaksanakan adalah:

1. Memperkukuh ekosistem untuk aktiviti ekonomi

- Ini akan tertumpu kepada meningkatkan pembangunan modal insan, menambah baik infrastruktur, utiliti dan kemudahan logistik serta memperkukuh rangkaian rantai bekalan dan menarik pelaburan berkualiti.
- Sehingga Disember 2017, sebanyak 131 projek dan program Kerajaan Persekutuan telah diluluskan di bawah RMKe-9, RMKe-10 dan RMKe-11 untuk perlaksanaan di Wilayah Ekonomi Pantai Timur (ECER). Jumlah pelaburan swasta yang diterima di ECER sejak tahun 2007 adalah sebanyak RM111.6 bilion (sehingga Disember 2017) dan pelaburan ini telah menjana 108,400 peluang pekerjaan dan 9,660 peluang perniagaan untuk rakyat di Wilayah Pantai Timur.
- Antara program dan projek berimpak tinggi yang sedang dan akan dilaksana oleh ECERDC di wilayah Timur adalah pembangunan Bandar Pelabuhan Kuantan (Pahang), Taman Industri Biopolimer Kertih (Terengganu) serta Taman Industri Halal Pasir Mas dan Taman Industri Tok Bali (Kelantan).

2. Memberi tumpuan kepada aktiviti kluster terpilih

- Usaha akan digalakkan untuk menarik lebih banyak pelaburan kepada kluster terpilih yang dikenalpasti berdasarkan kelebihan daya saing wilayah. Dalam hal ini, bidang fokus Wilayah Timur antaranya ialah sektor perlombongan dan pengkuarian, pertanian, pembuatan, logistik dan pelancongan.

Tuan Yang di-Pertua,

Untuk bidang keutamaan kedua iaitu merapatkan jurang pembangunan antara bandar dan luar bandar, strategi pertama ialah mempertingkatkan infrastruktur luar bandar yang akan dilaksanakan melalui inisiatif berikut:

1. Meningkatkan penyediaan rangkaian jalan raya

- Usaha akan diteruskan bagi membina dan menaik taraf jalan berturap di kawasan luar bandar bagi meningkatkan akses masyarakat luar bandar.

2. Memperluas liputan bekalan air

- Usaha untuk menambah baik akses kepada bekalan air bersih dan terawat akan dipergiatkan.
- Di bawah program bekalan air luar bandar (BALB) bagi tempoh 2016-2017, negeri Kelantan telah pun menerima peruntukan sejumlah RM75 juta, negeri Pahang sebanyak RM44.8 juta dan negeri Terengganu sebanyak RM14.1 juta. Bagi tahun 2018, sejumlah RM32 juta diperuntukan untuk Kelantan dan RM4.5 juta untuk Terengganu.

Tuan Yang di-Pertua,

Bagi strategi kedua, iaitu menambah baik hubung kait antara bandar dan luar bandar, inisiatif yang akan dilaksanakan termasuklah:

1. Mempertingkat ketersambungan dan pergerakan bagi memperkukuh ekonomi luar bandar

- Pengangkutan awam akan dipertingkat untuk menyediakan ketersambungan yang lebih baik antara kawasan bandar, bandar kecil dan luar bandar. Sebagai contoh, projek Lebuhraya Central Spine Road yang dilaksanakan secara berfasa meliputi jarak keseluruhan sepanjang 350km dari Bentong, Pahang hingga ke Kuala Krai, Kelantan dijangka siap sepenuhnya pada tahun 2025.

2. Memperluas akses kepada perkhidmatan asas

- Liputan dan akses kepada pelbagai kemudahan sosial dan ameniti asas di luar bandar akan dipertingkat melalui penambahbaikan perkhidmatan asas seperti pendidikan, penjagaan kesihatan primer serta penyediaan rumah mampu milik dan berkualiti. Sebagai contoh, dalam aspek kesihatan, sejumlah 83 projek pembangunan dengan kos projek sebanyak RM3 billion telah dilaksanakan bagi Wilayah Timur di bawah RMKe-11 (2016-2018). Antara projek-projek utama yang sedang dilaksanakan termasuk projek Pembinaan Hospital Kuala Krai di Kelantan, projek Pembinaan Hospital Dungun di Terengganu dan projek Pembinaan Hospital Bera di Pahang.

Bagi strategi ketiga, iaitu mewujudkan aktiviti ekonomi setempat di luar bandar, inisiatif yang akan dilaksanakan antaranya adalah seperti berikut:

1. Menggalakkan lebih banyak pelaburan swasta

- Usaha akan diteruskan untuk membangunkan usahawan luar bandar dengan mempergiat penyertaan sektor swasta di kawasan luar bandar bagi menarik pelaburan bernilai lebih tinggi serta melaksanakan program tanggungjawab sosial korporat (CSR).

2. Memanfaat ekonomi digital

- Ekonomi digital akan dimanfaatkan bagi peluasan dan kemampanan perniagaan di kawasan luar bandar.

Tuan Yang di-Pertua,

Secara amnya, strategi dan inisiatif yang dikenalpasti oleh Kerajaan dalam usaha untuk memastikan pembangunan wilayah lebih seimbang, termasuk wilayah Timur akan menyumbang ke arah mencapai pertumbuhan yang inklusif serta memastikan kesejahteraan seluruh rakyat Malaysia.

Sekian, terima kasih
26 November 2018

Kementerian Hal Ehwal Ekonomi

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

DARIPADA : TUAN WONG HON WAI [BUKIT BENDERA]

TARIKH : 26 NOVEMBER 2018

SOALAN : 7

Tuan Wong Hon Wai [Bukit Bendera] minta MENTERI DALAM NEGERI menyatakan :-

- (a) apakah usaha yang dilakukan untuk menjamin keselamatan penerbangan dan menghalang penumpang-penumpang penerbangan antarabangsa yang menggunakan pasport dan dokumen perjalanan palsu ; dan
- (b) berapa kali semakan dibuat terhadap Database Stolen & Lost Travel Documents (SLTD), Interpol pada tahun 2013-2018 mengikut tahun.

JAWAPAN

Tuan Yang Di Pertua,

Kawalan keselamatan Jabatan Imigresen Malaysia terhadap kemasukan pelancong asing dilakukan sebelum dan semasa ketibaan pelancong tersebut datang ke Malaysia. Pelancong dari negara-negara yang dikenakan syarat keperluan visa untuk masuk ke Malaysia wajib memohon dan memenuhi keperluan visa sebagai saringan awal (screening), dengan izin, bagi mengelakkan kemasukan individu yang tidak dikehendaki dan tidak memenuhi kelayakan memasuki negara ini. Pemeriksaan di pintu-pintu masuk negara dilakukan sepenuhnya melalui sistem semasa pelancong berurusan di kaunter pemeriksaan Imigresen iaitu melalui kaedah *facility advance document reader*, pengambilan data cap jari biometrik dan semakan butiran biodata dan dokumen pelancong melalui *Stolen and Lost Travel Document System* (SLTD). Sistem ini dibangunkan oleh Interpol dan berintegrasi dengan Polis Diraja Malaysia bagi mengesan dengan lebih awal jika terdapat sebarang penyalahgunaan dokumen perjalanan ataupun passport yang dilaporkan hilang atau dicuri dari negara-negara luar. Untuk maklumat Tuan Yang di-Pertua, di negara kita ini bila berlaku kehilangan passport, laporan dibuat, pihak polis akan *update* sistem ini dalam tempoh 24 jam. Semakan dan pengemaskinian rekod passport yang hilang atau dicuri ke dalam pangkalan data SLTD dibuat dalam tempoh 24 jam sebagaimana saya sebutkan tadi bagi mengelak berlakunya penyalahgunaan passport tersebut oleh pihak yang tidak bertanggungjawab. Sistem ini telah diguna pakai sejak tahun 2015 dan rekod kekerapan semakan pangkalan data SLTD adalah seperti berikut:

Bil.	Tahun	Kekerapan Semakan Kes
1	2015	1,081
2	2016	1,498
3	2017	928
4	2018	580

PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL PERTAMA
PARLIMEN KEEMPAT BELAS

PERTANYAAN : LISAN
DARIPADA : DATO' SRI HAJAH NANCY SHUKRI
[BATANG SADONG]
TARIKH : 26 NOVEMBER 2018 (ISNIN)

SOALAN NO. 8

Dato' Sri Hajah Nancy Shukri [Batang Sadong] minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada Kementerian akan melaksanakan sistem kuota 30% wanita di parlimen dan juga Dewan-Dewan Undangan Negeri.

JAWAPAN

Tuan Yang di-Pertua,

Pihak Kementerian tidak meletakkan dasar 30 peratus wanita dalam pembuat keputusan sebagai kuota tetapi ia merupakan sasaran minimum yang perlu dicapai dan dilepasi. Objektif dasar ini adalah untuk melepasi 30% dan mencapai kesaksamaan gender iaitu penglibatan sepenuhnya dan secara efektif dalam pembangunan negara.

Pelan Tindakan Pembangunan Wanita telah menggariskan wanita di peringkat pembuat keputusan dan politik sebagai salah satu sektor daripada 13 sektor yang disenaraikan. Penglibatan 30% wanita dalam kepimpinan merupakan (dengan izin) satu *critical mass* yang diterima umum oleh masyarakat antarabangsa selain untuk membangun dan mengembangkan potensi wanita.

Berdasarkan *Global Gender Gap Index* 2017, Malaysia berada pada kedudukan ke 104 daripada 144 buah negara dengan skor bagi *political empowerment* adalah 0.058 daripada skor 1. Satu skor yang amat rendah berbanding pendidikan iaitu 0.991 iaitu hampir mencapai gender pariti. Walau bagaimanapun saya percaya kedudukan Malaysia bagi skor ini akan meningkat mendadak tahun ini memandangkan Malaysia telah buat julung kalinya melantik seorang wanita sebagai Timbalan Perdana Menteri dan ini merupakan jawatan tertinggi yang pernah disandang oleh wanita Malaysia dalam politik. Di samping itu jumlah menteri wanita juga telah bertambah daripada 3 orang kepada 5 orang menteri.

Rekod terkini menunjukkan wanita sebagai Ahli Dewan Rakyat adalah seramai 32 orang daripada 222 orang iaitu 14.41% berbanding seramai 23 orang iaitu 10.4% bagi sebelum ini. Manakala untuk ahli Dewan-Dewan Undangan Negeri pula adalah seramai 57 daripada 505 orang iaitu 11.3% berbanding 58 daripada 505 kerusi DUN iaitu 11.5%. Bagi wanita dalam Dewan Negara pula keanggotaan, sekarang merupakan 13 orang wanita berbanding 67 orang iaitu 19.4%.

SOALAN NO. 8

Inisiatif bagi meningkatkan peratusan wanita dalam bidang politik adalah satu inisiatif yang harus digalas bersama oleh semua komponen parti-parti politik. Mandat yang diberikan kepada wanita dalam mewakili suara rakyat yang diwakili tidak kira di peringkat Dewan undangan Negeri (DUN) mahupun Parlimen merupakan satu lembaran baru dalam arena politik di Malaysia.

Saya berharap wanita-wanita yang memegang portfolio dalam kerajaan juga dapat menunjukkan contoh yang terbaik daripada segi prestasi dan integriti supaya Kerajaan dan rakyat akan terus memberi mandat kepada wanita di masa hadapan.

Bagi meningkat penglibatan berterusan wanita di Parlimen dan Dewan Undangan Negeri, parti-parti politik yang merupakan *stakeholders* utama perlu terus mengambil perhatian dan melaksanakan strategi terutama ketika proses pencalonan dengan menggalakkan lebih ramai calon wanita yang bertanding dan mengembangkan potensi wanita di peringkat akar umbi untuk digilap menjadi pemimpin masa hadapan.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 26 NOVEMBER 2018 (ISNIN)

SOALAN : 9

PR-1412-L02030

**Tuan Ahmad Fahmi bin Mohamed Fadzil [Lembah Pantai] minta
MENTERI KOMUNIKASI DAN MULTIMEDIA menyatakan :-**

a) jumlah bilangan menara telekomunikasi yang telah dibina di sekitar kawasan perumahan, sekolah dan rumah ibadat dalam jarak 200 meter dalam tahun 2013 -2018; dan

b) adakah Kerajaan akan mengkaji semula kesesuaian lokasi menara-menara tersebut dan kesan terhadap kesihatan orang awam dalam jangka masa yang panjang.

JAWAPAN:

Tuan Yang di-Pertua,

Pertanyaan (a)

1. Untuk makluman Ahli yang Berhormat, Data mengenai menara komunikasi di kawasan sekolah yang dibina di bawah Projek Bestarinet boleh dirujuk kepada Kementerian Pendidikan Malaysia. Walaubagaimanapun, semua menara dan struktur komunikasi adalah tertakluk kepada “Garis Panduan Pembinaan Menara dan Struktur Pemancar Komunikasi” yang telah ditetapkan oleh Kementerian Perumahan dan Kerajaan Tempatan (KPKT) dan terletak di bawah bidang kuasa Pihak Berkuasa Tempatan (PBT).
2. Sehingga kini, sejumlah 20,023 struktur komunikasi telah beroperasi di seluruh negara.
3. Di Malaysia, pembinaan menara komunikasi dibina mengikut garis panduan yang telah diselaraskan dengan mematuhi piawaian keselamatan antarabangsa dan amalan keselamatan yang ditetapkan.
4. Pemasangan kesemua struktur komunikasi adalah bagi menambahbaik kualiti perkhidmatan komunikasi secara menyeluruh di rantau negara termasuk di kawasan bandaraya-bandaraya.

Pertanyaan (b)

1. Daripada sudut keselamatan dan persekitaran, jarak menara di lokasi tersebut adalah mematuhi jarak minimum menara yang ditetapkan dalam “Garis Panduan Pembinaan Menara dan Struktur Sistem Pemancar Telekomunikasi dalam Kawasan Pihak Berkuasa Tempatan 2002” yang dikeluarkan oleh Kementerian Kesejahteraan Bandar, Perumahan dan Kerajaan Tempatan—sekarang dikenali sebagai Kementerian Perumahan dan Kerajaan Tempatan di mana pembinaan semua jenis menara telekomunikasi hendaklah berpandukan jadual berikut:

	Jarak minimum menara dari bangunan terdekat (meter) – <i>nearest existing building</i>	
Jenis Bangunan	Ketinggian Menara Bawah daripada 45 meter	Ketinggian Menara 45 meter dan lebih
Kediaman	20 meter	30 meter
Komersial	10 meter	15 meter
Industri	5 meter	10 meter

2. Pemilihan lokasi menara yang bersesuaian dibuat adalah berdasarkan penilaian teknikal yang terperinci. Jarak yang selamat untuk setiap menara dengan struktur bangunan adalah sekurang-kurangnya 30 meter.
3. Bagi pembinaan menara komunikasi sama ada di kawasan bandar, luar bandar atau taman perumahan, pembinaan hendaklah berpandukan kepada “Garis Panduan Pembinaan

SOALAN NO: 9

Menara dan Struktur Pemancar Komunikasi” yang telah ditetapkan oleh KPKT. Garis panduan tersebut menyatakan keperluan jarak anjakan dengan had ketinggian tertentu, keperluan keselamatan seperti pagar dan langkah penstabilan cerun serta aspek-aspek lain yang perlu dipatuhi oleh syarikat penyedia perkhidmatan.

4. Maklumat daripada penduduk atau orang awam berhubung tahap liputan perkhidmatan amat berguna dalam membantu pihak syarikat penyedia perkhidmatan membuat perancangan bagi menambahbaik liputan dan kualiti perkhidmatan yang ditawarkan. Manakala peranan Pihak Berkuasa tempatan (PBT) pula amat diperlukan dalam menerima permohonan baru sesuatu pembangunan infrastruktur komunikasi dalam kawasan pentadbiran mereka. Jawatankuasa Setempat (OSC) di peringkat PBT turut diwakili oleh agensi-agensi teknikal yang berkepakaran dalam bidang tugas masing-masing seperti SKMM, TNB, DCA dan BOMBA bagi menilai dan mengulas sesuatu permohonan tersebut. Peranan persatuan penduduk dan Pihak Berkuasa Tempatan (PBT) adalah penting di mana maklumat-maklumat berkenaan kawasan yang belum mendapat liputan ataupun yang mempunyai isu kualiti perkhidmatan boleh disalurkan kepada SKMM bagi perancangan peluasan dan penambahbaikkkan liputan komunikasi.
5. Walaubagaimanapun, lokasi sebenar menara yang akan dibina adalah bergantung kepada faktor teknikal seperti ketersediaan *line of sight*, rangkaian sedia ada dan bekalan elektrik, dan kelulusan muktamad bagi pembinaan sesuatu menara akan ditentukan oleh pihak PBT yang berkaitan.

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : TUAN ANYI NGAU
[BARAM]**

TARIKH : 26 NOVEMBER 2018 (ISNIN)

SOALAN : 10

minta **MENTERI PEMBANGUNAN LUAR BANDAR** menyatakan apakah rancangan baikpulihan bekas Jalan balak / Bekalan Air Luar Bandar (BALB)/ Bekalan Elektrik Luar Bandar (BELB) yang diluluskan di pedalaman Sarawak. Bilangan projek yang diteruskan atau dibatalkan serta jumlah peruntukan yang terbabit khususnya di Kawasan Parlimen Baram.

JAWAPAN

Tuan Yang Di-Pertua,

Untuk makluman Yang Berhormat, bagi Rancangan Malaysia Kesebelas (RMKe-11), anggaran siling yang diluluskan bagi bekalan air terawat dan bekalan elektrik di negeri Sarawak adalah sebanyak RM4.45 billion dengan pecahan RM2.96 billion bagi projek Bekalan Air Luar Bandar (BALB) dan RM1.49 billion bagi projek Bekalan Elektrik Luar Bandar (BELB).

Bagi projek Bekalan Air Luar Bandar Sarawak, sepanjang tempoh 2016 hingga 2018, sebanyak RM405 juta telah diperuntukkan bagi pelaksanaan 38 Projek Bekalan Air Luar Bandar (BALB) Negeri Sarawak. Nilai kos keseluruhan bagi 38 projek tersebut adalah sebanyak RM1.8 billion.

Bagi pelaksanaan projek Bekalan Elektrik Luar Bandar (BELB) Sarawak pula, bermula pada tahun 2016 sehingga 2018, sejumlah RM1.18 bilion telah diperuntukkan bagi negeri Sarawak yang melibatkan 9 projek BELB.

Manakala bagi Projek Menaiktaraf Jalan Balak di Negeri Sarawak pula telah diluluskan pelaksanaannya dengan kos keseluruhan sebanyak RM557.4 juta yang melibatkan Fasa 1 hingga Fasa 6.

Untuk makluman Yang Berhormat juga, bagi Parlimen Baram sahaja, satu projek Bekalan Air Luar Bandar (BALB) telah diluluskan pelaksanaannya di bawah RMKe-11 Rolling Plan Kedua (RP2) iaitu Projek Bekalan Air Luar Bandar Kawasan Marudi, Bahagian Miri dengan kos sebanyak RM42.4 juta. Status projek terkini adalah perlu ditender semula secara tender terbuka yang telah dilaksanakan pada 8 November 2018 dan kerja-kerja pembinaan dijangka akan bermula pada suku pertama tahun 2019.

Manakala sejumlah RM33.9 juta pula telah diperuntukkan bagi pelaksanaan 10 projek Bekalan Elektrik Luar Bandar (BELB) di Parlimen Baram yang akan memberikan manfaat bekalan elektrik 24 jam kepada 854 buah rumah apabila keseluruhan projek siap kelak.

NO SOALAN : 10

Daripada 8 projek BELB tersebut, sebanyak 4 projek telah siap pelaksanaannya manakala 6 lagi projek dalam pelaksanaan dan dijangka akan siap menjelang April 2020.

Manakala bagi projek Jalan Balak di Parlimen Baram, Projek Jalan Balak Negeri Sarawak (Fasa 4): Bahagian Miri telah diluluskan di bawah Rolling Plan Pertama, Rancangan Malaysia Kesebelas (RP1, RMKe-11) dengan kos keseluruhan berjumlah RM70.6 juta.

Skop kerja bagi projek ini adalah menaiktaraf jalan balak sepanjang 199.6 km. Dalam keseluruhan jajaran ini, sepanjang 190 km adalah di dalam kawasan Parlimen Baram dengan kos projek berjumlah RM66.39 juta. Status semasa bagi ini adalah didalam peringkat reka bentuk akhir.

Walau bagaimanapun, projek ini hanya dibenarkan pelaksanaannya sehingga ke peringkat rekabentuk sahaja dan fasa pembinaan bagi projek ini perlu dipohon semula di dalam Rancangan Malaysia yang akan datang berdasarkan arahan Kementerian Kewangan.

SOALAN NO: 11

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB PUAN WONG SHU QI

TARIKH : 26 NOVEMBER 2018

SOALAN :

Puan Wong Shu Qi [Kluang] minta **MENTERI TENAGA MANUSIA** menyatakan rancangan untuk menarik bakat-bakat Malaysia yang bermastautin di luar negara pulang berkhidmat di tanah air.

PR-1412-L02383

JAWAPAN

Tuan Yang Di Pertua,

1. Kementerian ini melalui Talent Corporation Malaysia Berhad (*TalentCorp*) telah ditubuhkan pada Januari 2011 dengan mandat untuk memupuk, menarik dan mengekal modal insan berkemahiran tinggi bagi memacu pembangunan dan perkembangan ekonomi negara. Pada masa yang sama, ia juga bertujuan untuk menggalakkan migrasi pengetahuan dan kepakaran dalam melahirkan tenaga kerja tempatan yang bertaraf antarabangsa.

2. Para profesional yang kembali ke tanah air melalui *Returning Expert Program (REP)* telah membawa pulang pengetahuan, kemahiran dan jaringan profesional mereka di luar negara dengan mengisi pelbagai jawatan penting dalam organisasi di Malaysia. Antara jawatan-jawatan yang disandang adalah termasuk Ketua Pegawai Eksekutif (CEO), Ketua Pegawai Kewangan (CFO), Ketua Pegawai Teknologi (CTO), pakar perubatan di hospital Kerajaan dan swasta, profesor di institusi pengajian tinggi dan sebagainya.

3. Pelaksanaan REP juga telah melalui beberapa fasa penambahbaikan bagi memastikan kualiti modal insan berkemahiran tinggi yang diluluskan adalah selaras dengan keperluan semasa industri dan ekonomi negara. Melalui penambahbaikan pelaksanaan

REP juga, lebih 4900 modal insan berkemahiran tinggi telah diluluskan di bawah program ini sehingga bulan September 2018.

4. Usaha TalentCorp juga tidak terhad kepada pelaksanaan REP sahaja bahkan ianya turut merangkumi pendekatan untuk menghubungkan tenaga kerja mahir Malaysia di luar negara dengan peluang pekerjaan tersedia dalam negara. Pendekatan ini juga selaras dengan laporan Bank Dunia seperti di atas yang menyatakan bahawa rakyat Malaysia yang telah mendapat pekerjaan lebih cenderung untuk pulang ke Malaysia.

5. Di samping itu, sesi temu seru di luar negara juga turut diadakan terutamanya di negara yang dikenal pasti mempunyai populasi rakyat Malaysia yang tinggi. Sesi temu seru ini diadakan dengan keterlibatan syarikat Malaysia dengan matlamat untuk mengetengahkan peluang-peluang pekerjaan profesional yang terbuka luas di Malaysia.

6. Menyedari bahawa kejayaan REP banyak dipengaruhi oleh faktor luaran (contoh: keadaan ekonomi negara, kadar tukaran mata wang, sistem pendidikan, status kewarganegaraan ahli keluarga), baru-baru ini TalentCorp telah mengambil langkah strategik dengan memperkenalkan Program Diaspora Perantauan Profesional Malaysia atau lebih dikenali sebagai KNOWMADS untuk memudahkan cara para profesional yang kini berada di perantauan untuk masih

memberikan sumbangan dan berkongsi kepakaran mereka untuk pembangunan negara melalui pendekatan-pendekatan berikut:

- i. Perkongsian, pertukaran dan pemindahan ilmu pengetahuan, kemahiran, teknologi dan kajian dalam bidang pembelajaran dan pertumbuhan utama negara;
- ii. Memudah cara jaringan perhubungan untuk memacu lebih banyak sumbangan dari diaspora;
- iii. Mewujudkan ruang perniagaan melalui perkongsian, usaha sama dan peluang pelaburan;
- iv. Platform perkongsian hasil kajian dan syor-syor penambahbaikan berkaitan dengan sektor utama ekonomi; dan
- v. Khidmat rundingan profesional dan maklumat dalam bidang kepakaran masing-masing.

7. Pelaksanaan program dan inisiatif yang diterajui TalentCorp dikategorikan berdasarkan tiga pecahan segmen bakat dalam usaha mengurangkan jurang perbezaan kemahiran selaras dengan keperluan pasaran (*market-driven*) dalam memacu ekonomi iaitu:

- i. Pertamanya, tenaga bakat dalam negara yang merangkumi pelaksanaan *Scholarship Talent Attraction & Retention* (STAR) – (turut merangkumi pemegang biasiswa di luar negara), Latihan Industri Berstruktur (*Structured Internship Programme*), *Nurturing Expert Talent (NEXT) Upskilling*,

Program Penglibatan Kembali Wanita dalam Kerjaya (*Career Comeback Programme*) dan pelaksanaan *Work-Life Practices (WLPs)*;

- ii. Keduanya, tenaga bakat profesional Malaysia di luar negara yang merangkumi pelaksanaan inisiatif *Scholarship Talent Attraction & Retention (STAR)*, Program Kepulangan Pakar (*Returning Expert Programme - REP*), Program Diaspora Perantauan Profesional Malaysia (KNOWMADS); dan
- iii. Ketiganya, tenaga bakat asing berkemahiran tinggi yang merangkumi pelaksanaan Pas Residen-Bakat (*Residence Pass-Talent – RP-T*).

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL PERTAMA
PARLIMEN KE-EMPAT BELAS**

PERTANYAAN : LISAN

**DARIPADA : TUAN CHE ALIAS BIN HAMID
[KEMAMAN]**

TARIKH : 26 NOVEMBER 2018 (ISNIN)

SOALAN NO. 12

Minta **MENTERI PENGANGKUTAN** menyatakan statistik kemalangan jalan raya dan menjelaskan punca-puncanya.

JAWAPAN

Yang di-Pertua,

1. Pada tahun 2017, seramai 6,740 orang terkorban akibat kemalangan jalan raya iaitu pengurangan sebanyak 5.76% berbanding jumlah kematian yang telah direkodkan pada tahun 2016 iaitu sebanyak 7,152. Statistik kemalangan setakat bulan Jun 2018 melibatkan korban nahas jalan raya adalah seramai 3,279.
2. Berdasarkan perbandingan dengan statistik angka korban yang direkodkan sehingga bulan Jun tahun lalu iaitu seramai 3,332, terdapat pengurangan sebanyak 53 kematian atau bersamaan 1.59%. Namun, berlaku peningkatan sebanyak 4.11% atau 86 penunggang/pembonceng motosikal yang terkorban akibat kemalangan jalan raya berbanding bulan Jun tahun lalu.

3. Bilangan pemandu motokar yang terkorban akibat kemalangan jalan raya pada tahun 2017 mencatatkan angka sebanyak 1,269 manakala bilangan penunggang motosikal yang terkorban adalah sebanyak 4,348 iaitu 64.5% daripada jumlah keseluruhan angka korban.
4. Punca-punca berlakunya kemalangan maut di jalan raya bagi tahun 2016 dan 2017 dijelaskan berdasarkan tiga (3) kesalahan utama iaitu memandu laju, memandu secara cuai dan membelok secara merbahaya.
5. Kesalahan-kesalahan utama yang dilakukan oleh penunggang motosikal sehingga menyebabkan kemalangan pada tahun 2016 ialah tidak mengikut lampu isyarat serta mengekori dan membelok secara merbahaya. Bagi tahun 2017 pula ialah menunggang dengan laju, membelok secara merbahaya dan memotong secara merbahaya.
6. Punca-punca utama kemalangan jalan raya pada setiap tahun yang disebabkan oleh kerosakan mekanikal kenderaan adalah kegagalan fungsi brek, asap berlebihan dan tayar botak. Manakala punca-punca utama kemalangan jalan raya pada setiap tahun yang melibatkan pejalan kaki pula adalah disebabkan cuai melintas jalan serta berjalan dan bermain di jalan raya.
7. Kementerian amat komited melaksanakan penguatkuasaan berterusan secara tegas dan menjalankan program advokasi keselamatan jalan raya di seluruh negara dengan harapan agar jumlah kemalangan terutamanya angka kematian akibat kemalangan jalan raya dapat terus dikurangkan setiap tahun.

PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL PERTAMA
PARLIMEN KEEMPAT BELAS

PERTANYAAN : JAWAB LISAN
DARIPADA : TUAN MUSLIMIN BIN YAHYA
[SUNGAI BESAR]
TARIKH : 26 NOVEMBER 2018 (ISNIN)

SOALAN NO. 13

Tuan Muslimin bin Yahaya [Sungai Besar] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah pihak KPWKM bercadang supaya memberi peluang kepada pemimpin Kerajaan menyampaikan bantuan bulanan JKM secara bersemuka (secara tunai) kepada klien JKM secara berkala.

JAWAPAN

Tuan Yang di-Pertua,

Kementerian melalui Jabatan Kebajikan Masyarakat (JKM) menyediakan bantuan kewangan kebajikan secara bulanan dan sekali gus untuk meringankan beban kumpulan sasar yang memerlukan. Skim bantuan bulanan tersebut adalah Bantuan Kanak-Kanak (BKK), Elaun Pekerja Cacat (EPC), Bantuan OKU Tidak Berupaya Bekerja (BTB), Bantuan Penjagaan OKU Terlantar/Pesakit Kronik Terlantar (BPT), Bantuan Orang Tua (BOT), Bantuan Anak Pelihara (BAP), Bantuan Latihan Perantis (BLP) dan Bantuan Am Persekutuan. Manakala bantuan sekali gus iaitu Bantuan Geran Pelancaran, Bantuan Alat Tiruan/Alat Sokongan dan Bantuan Tabung Bantuan Segera.

Bayaran kepada penerima bantuan JKM dilaksanakan sepenuhnya melalui kaedah perbankan *Electronic Fund Transfer (EFT)* di seluruh negara. Langkah ini diambil berdasarkan saranan Jabatan Audit Negara pada tahun 2017 yang mengesyorkan agar proses pembayaran bantuan kewangan persekutuan secara tunai diganti dengan proses pembayaran melalui bank sepenuhnya. Ia bertujuan bagi memastikan bayaran bantuan kewangan persekutuan dilaksanakan secara sistematik dan teratur. Di samping itu, kaedah ini boleh mengurangkan risiko kehilangan, ketirisan, penyelewengan dan penyalahgunaan kuasa dan wang awam.

Bagi memastikan kaedah bayaran melalui bank ini lebih efisien maka pada tahun 2018, integrasi Sistem Pengurusan Bantuan Kebajikan atau e-Bantuan dan iGFMAS (*Integrated Government Financial & Management System*) telah dilaksanakan oleh semua Pejabat Kebajikan Masyarakat Daerah sebagai Pusat Tanggungjawab (PTJ) yang mengendalikan perkhidmatan bantuan kewangan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

**DARIPADA : DATO' HAJI JALALUDDIN BIN HAJI ALIAS
[JELEBU]**

TARIKH : 26 NOVEMBER 2018

SOALAN : 14

**Dato' Haji Jalaluddin bin Haji Alias [Jelebu] minta MENTERI
DALAM NEGERI** menyatakan apakah komitmen Kementerian dalam
membanteras lambakan pusat perjudian haram dan pusat refleksologi
yang menawarkan perkhidmatan pelacuran terutamanya di bandar-
bandar besar.

JAWAPAN:

Tuan Yang Di-pertua,

Pelacuran merupakan satu kesalahan jenayah yang diklasifikasikan di bawah Seksyen 372, Seksyen 372A dan Seksyen 372B, Kanun Keseksaan. Polis Diraja Malaysia (PDRM) sentiasa memantau dan mengambil tindakan tegas terhadap individu atau ahli sindiket yang menjalankan aktiviti yang tidak bermoral ini.

Dalam memastikan aktiviti pelacuran ini tidak menjejaskan kerukunan dan keharmonian masyarakat, pelbagai langkah dan usaha telah diambil oleh pihak PDRM untuk mengekang kegiatan pelacuran dalam negara seperti berikut:

- i) Melancarkan “Ops Noda” di seluruh negara dengan membuat pemeriksaan di premis-premis hiburan dan sarang-sarang pelacuran yang dikenal pasti melalui risikan yang telah dijalankan.
- ii) Menguatkuasakan undang-undang ke atas pemilik premis atau penjaga yang ditangkap di bawah Seksyen 55(B) Akta Imigresen 1959/63 (Tindakan Ke Atas Majikan/Penjaga) dan perempuan-perempuan yang menyalahgunakan pas lawatan akan ditangkap di bawah Seksyen 39(B) Peraturan-Peraturan Imigresen 1959/63 (Langgar Syarat Pas Lawatan).
- iii) Menyenarai hitamkan perempuan-perempuan warganegara asing yang dikenal pasti sering memasuki negara ini khusus untuk menjalankan kegiatan pelacuran/pelayan pelanggan.

- iv) Mengenalpasti tempat-tempat yang sering menjadi “*point of entry*” daripada sindiket-sindiket yang membawa perempuan-perempuan warganegara asing untuk dijadikan pelacur untuk tindakan pencegahan dan menyelamatkan mangsa.
- v) Tindakan di bawah Akta Pencegahan Jenayah (POCA) ke atas mereka yang terlibat menganjur aktiviti pelacuran dan pelayan pelanggan yang tiada keterangan untuk dituduh di Mahkamah.
- vi) Mengambil tindakan di bawah Akta Pencegahan Penggubahan Wang Haram, Pencegahan Pembiayaan Keganasan dan Hasil daripada Aktiviti Haram (AMLATFPUAA) dengan menyita harta alih dan harta tidak alih penganjur pelacuran yang diperoleh daripada hasil aktiviti haram.

Dalam memastikan aktiviti perjudian haram dapat dikekang sepenuhnya langkah terbaharu yang diperkenalkan oleh Polis Diraja Malaysia (PDRM) dengan mewujudkan bilik gerakan serta talian khas yang beroperasi 24 jam sehari di seluruh negara bermula 20 Julai 2018 bagi memudahkan orang awam menyalurkan maklumat berkaitan perjudian tanpa lesen kepada pihak PDRM.

Bagi memastikan aktiviti perjudian ini tidak lagi beroperasi, Ketua Polis Daerah dan Ketua Polis Balai akan dipertanggungjawab sepenuh dan tindakan untuk menukarkan dari daerah berkenaan akan dibuat secara serta merta dan tindakan tatatertib akan diambil jika siasatan yang dibuat oleh Jabatan Integriti dan Pematuhan Standard (JIPS) mendapati pegawai polis terlibat atau melindungi sindiket perjudian.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN LARRY SOON @ LARRY SNG SHIEN
[JULAU]**

TARIKH : 26 NOVEMBER 2018 (ISNIN)

SOALAN NO. 15

Minta **MENTERI PENDIDIKAN** menyatakan bilakah implementasi projek penyambungan grid bekalan elektrik akan dijalankan di Sarawak dan senaraikan sekolah-sekolah di Sarawak yang terlibat dalam projek ini.

JAWAPAN

Tuan Yang DiPertua,

Untuk makluman Ahli Yang Berhormat, sejumlah 371 buah sekolah di kawasan luar bandar di Sarawak telah dikenal pasti tiada kemudahan bekalan elektrik. Daripada jumlah tersebut 14 buah sekolah telah disambung ke talian grid awam di bawah projek Fasa 1 pada tahun 2017. Manakala 357 buah sekolah selebihnya menerima bekalan elektrik melalui set janakuasa (*genset*).

Pada masa yang sama, Kementerian Pendidikan Malaysia (KPM) dalam perancangan untuk melaksanakan kerja-kerja penyambungan bekalan elektrik ke talian grid awam dan pembinaan sistem solar bagi sekolah-sekolah berkenaan secara berperingkat-peringkat mulai tahun 2018 hingga tahun 2030 seperti berikut:

1. Projek Fasa 2A mulai tahun 2018 – 2019 melibatkan penyambungan 55 buah sekolah ke talian grid awam.
2. Projek Fasa 2B mulai tahun 2019 – 2020 melibatkan penyambungan 58 buah sekolah ke talian grid awam.
3. Projek Fasa 3 mulai tahun 2021 – 2025 melibatkan penyambungan 141 sekolah ke talian grid awam.
4. Projek Fasa 4 mulai tahun 2026 – 2030 melibatkan pembinaan sistem solar di 103 buah sekolah.

Sekian, terima kasih.

RJM116a

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SRI BUNG MOKTAR BIN RADIN
[KINABATANGAN]
TARIKH : 26 NOVEMBER 2018 (ISNIN)

SOALAN NO. 16

Y.B. DATO' SRI BUNG MOKTAR BIN RADIN [KINABATANGAN] minta **MENTERI KEWANGAN** menyatakan sejauh manakah pelaksanaan Cukai Jualan dan Perkhidmatan (SST) dapat membantu meningkatkan pendapatan negara dan seterusnya membantu meringankan beban kos sara hidup rakyat.

JAWAPAN

Tuan Yang di-Pertua,

1. Hasil Kerajaan Persekutuan bagi tahun 2019 adalah dianggarkan RM261.8 bilion yang meliputi hasil cukai berjumlah RM176.2 bilion manakala hasil bukan cukai berjumlah RM85.6 bilion. Manakala bagi tahun 2018, jumlah hasil Kerajaan Persekutuan dianggarkan sebanyak RM236.5 bilion. Bagi tahun 2019, hasil daripada cukai jualan dan cukai perkhidmatan (SST) adalah dianggarkan RM22 bilion.

Tuan Yang di-Pertua,

2. Bagi meningkatkan kutipan hasil, seperti yang telah diumumkan dalam Belanjawan 2019, Kerajaan telah menubuhkan Jawatankuasa Pembaharuan Cukai bagi menjalankan kajian menyeluruh mengenai sistem percukaian negara termasuk mengenal pasti sumber pendapatan baru. Kerajaan turut akan melaksanakan inisiatif dengan semakan semula dasar percukaian dan memanfaatkan aset. Melalui inisiatif semakan semula dasar percukaian, antara langkah yang akan dilaksanakan bagi meningkatkan hasil Kerajaan adalah seperti berikut:

1. Mengenakan Cukai Perkhidmatan ke atas perkhidmatan yang diimport termasuk perkhidmatan atas talian;
2. Melancarkan Program Khas Pengakuan Sukarela (*Special Voluntary Disclosure Program*) bagi meningkatkan pengisytiharan pendapatan oleh pembayar cukai secara sukarela;
3. Melaksanakan Pertukaran Maklumat Secara Automatik (AEOI) dengan pihak berkuasa percukaian lain di bawah inisiatif *Organisation for Economic and Co-Operation and Development* (OECD) untuk meningkatkan ketelusan percukaian;
4. Mengkaji semula layanan cukai dan insentif sedia ada di bawah pelbagai perundangan bagi memastikan ianya relevan dan dapat mengurangkan

ketirisan hasil;

5. Meningkatkan aktiviti audit dan siasatan oleh Lembaga Hasil Dalam Negeri dan Jabatan Kastam Diraja Malaysia (JKDM) bagi meningkatkan pematuhan cukai dan mengurangkan jurang cukai.
6. Meningkatkan usaha membanteras aktiviti penyeludupan dan penipuan khususnya penyeludupan rokok oleh JKDM;
7. Mengenakan levi pelepasan (*departure levy*) bagi semua penumpang ke luar negara melalui laluan udara;
8. Memperkemas Cukai Keuntungan Harta Tanah (*Real Property Gains Tax*) ke atas keuntungan daripada pelupusan harta tanah dan saham dalam syarikat hartanah dalam tahun ke-6 dan tahun seterusnya. ;
9. Menaikkan kadar duti setem bagi pemindahan hartanah bernilai lebih RM1 juta daripada 3% kepada 4%;
10. Menamatkan pengecualian cukai pendapatan faedah yang diperolehi daripada dana pasaran wang pemborong (*wholesale money market funds*) kerana dana ini telah mencatatkan pertumbuhan yang kukuh pada kadar 24% setiap tahun sejak 2010; dan
11. Menaikkan kadar cukai, fi dan levi ke atas sektor perjudian yang tidak dinaikkan sejak tahun 2005.

3. Selain itu, melalui inisiatif memanfaatkan aset, Kerajaan akan melaksanakan langkah seperti berikut:

1. Mengurangkan pegangan dalam syarikat bukan strategik;
2. Melaksanakan model kerjasama awam swasta (PPP) yang sebenar bagi projek berdasarkan transaksi tukaran tanah secara tender terbuka dan bukannya menjalankan kaedah rundingan terus;
3. Melaksanakan penjualan tanah secara berjadual dan berperingkat kepada pembida tertinggi tertakluk kepada syarat tanah; dan
4. Menswastakan aset infrastruktur Kerajaan melalui pewujudan Amanah Pelaburan Hartanah (REIT) bagi Lapangan Terbang.

Tuan Yang di-Pertua,

4. Di bawah rejim Cukai Barang dan Perkhidmatan (GST), hanya 545 barangan dikecualikan cukai manakala semasa pelaksanaan SST, hampir sepuluh kali ganda jumlah barangan telah dikecualikan daripada Cukai Jualan. Tambahan pula, hanya 100,000 syarikat akan mengutip cukai di bawah pelaksanaan SST berbanding 470,000 jumlah syarikat semasa rejim GST. Berdasarkan kajian awal Kementerian Perdagangan Dalam Negeri dan Hal Ehwal Pengguna, 70% atau 291 daripada 417 barang dan perkhidmatan yang telah diperiksa, didapati terdapat penurunan harga pada September 2018 berbanding semasa rejim GST pada Mei 2018. Seluruh rakyat termasuk komuniti perniagaan dijangka mendapat manfaat melebihi RM17 bilion berikutan perubahan rejim cukai GST kepada SST pada 2018. Ini bermakna rakyat terutama isi rumah berpendapatan rendah mempunyai aliran wang tunai yang lebih tinggi dan seterusnya membolehkan mereka menggunakan lebihan pendapatan boleh guna untuk tujuan perbelanjaan keperluan harian yang lain. Hal ini secara tidak langsung akan membantu meringankan beban mereka dalam menghadapi peningkatan kos sara hidup.

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA
PARLIMEN KEEMPAT BELAS
MAJLIS MESYUARAT DEWAN RAKYAT

PERTANYAAN : LISAN

DARIPADA : TUAN ALI ANAK BIJU
[SARATOK]

TARIKH : 26 NOVEMBER 2018 (ISNIN)

SOALAN :

minta **MENTERI INDUSTRI UTAMA** menyatakan sejauh mana pelaksanaan pembekuan pembukaan ladang baru untuk penanaman kelapa sawit. Adakah pembekuan ini melibatkan penanaman kelapa sawit di tanah adat bumiputera Sabah dan Sarawak.

JAWAPAN

Tuan Yang di-Pertua,

Pada masa ini, tiada dasar Kerajaan berhubung pembekuan pembukaan ladang baru untuk penanaman kelapa sawit. Walau bagaimanapun, pihak Kementerian sedang mengadakan perbincangan bersama pemegang taruh terutamanya kerajaan-kerajaan negeri untuk membangunkan polisi pembukaan tanah baharu supaya tidak melibatkan penyahhutan dan kemusnahan biodiversiti. Dalam hal ini juga, pembukaan tanah baru yang melibatkan hutan simpan kekal adalah tidak dibenarkan. Manakala pembukaan kawasan penanaman kelapa sawit yang baharu di atas tanah adat Bumiputera Sabah dan Sarawak adalah dibawah bidang kuasa Kerajaan Negeri masing-masing. Kerajaan Negeri Sabah berpandangan sama dengan Kerajaan Persekutuan Malaysia untuk tidak membenarkan sebarang perluasan ladang kelapa sawit ke kawasan rizab hutan kekal. Ketua Menteri Sabah juga komited untuk meningkatkan amalan pengurusan hutan lestari bagi menggiatkan semula sektor itu sebagai penyumbang ekonomi yang penting kepada negara. (1 Oktober 2018)

PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)
DEWAN RAKYAT

PERTANYAAN : LISAN

DARIPADA : YB DATO' SRI HAJI TAJUDDIN BIN ABDUL RAHMAN [PASIR SALAK]

TARIKH : 26 NOVEMBER 2018 (ISNIN)

SOALAN:

Dato' Sri Haji Tajuddin bin Abdul Rahman [Pasir Salak] minta **PERDANA MENTERI** menyatakan kesahihan gerakan memurtadkan umat Islam, jika ada dan apakah langkah-langkah mencegah oleh pihak Kerajaan.

JAWAPAN : (YB DATUK SERI DR MUJAHID YUSOF,
MENTERI DI JABATAN PERDANA MENTERI)

Tuan Yang Di-Pertua,

Kerajaan mengambil perhatian serius dalam membendung sebarang cubaan atau gerakan yang boleh membawa kepada ancaman akidah umat Islam. Dalam isu ini, Kerajaan melalui Jabatan Kemajuan Islam Malaysia (JAKIM) dengan kerjasama Jabatan Agama Islam Negeri (JAIN) serta agensi Kerajaan yang lain seperti PDRM bersama-sama menjalankan tanggungjawab selaras dengan peruntukan sedia ada. Pemantauan yang berterusan dijalankan disamping mengadakan beberapa program bagi memantapkan lagi akidah umat Islam.

Antara **tindakan pencegahan** yang diambil adalah seperti mengadakan program pemantapan akidah kepada kumpulan yang berpotensi terdedah dengan cubaan murtad, menjalankan kajian dan mengesan pendekatan berkesan bagi mengawal elemen yang memesongkan akidah ummat Islam, melaksanakan tindakan undang-undang secara bersepadu antara pelbagai agensi Kerajaan peringkat pusat dan negeri, mengadakan majlis-majlis penjelasan akidah, memantapkan program pendidikan formal dan tidak formal ke arah umat Islam lebih celik agama, membantu meninggikan syiar Islam melalui penganjuran hari-hari kebesaran Islam dan program-program keagamaan di peringkat kebangsaan dan antarabangsa, memberi penerangan dan penjelasan mengenai penyelewengan akidah kepada umum serta menerbit dan menyebarkan buku atau risalah berkaitan fahaman akidah serta menyiarkannya menerusi media massa dan elektronik.

Dari aspek perundangan pula, pihak berkuasa agama negeri-negeri yang telah mempunyai undang-undang yang dinamakan sebagai Enakmen Kawalan dan Sekatan Pengembangan Agama Bukan Islam Kepada Orang Islam bagi mencegah penyebaran agama lain secara terbuka kepada orang-orang Islam. Ini selaras dengan Perkara 11(4) Perlembagaan Persekutuan. Negeri-negeri yang telah menguatkuasakan Enakmen Kawalan dan Sekatan Pengembangan Agama Bukan Islam Kepada Orang Islam ialah Terengganu, Kelantan, Selangor, Perak, Melaka, Kedah, Pahang, Negeri Sembilan, Johor dan Perlis.

Sekian, terima kasih.

SOALAN NO : 19

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB DATO' MANSOR BIN OTHMAN

KAWASAN : NIBONG TEBAL

TARIKH : 26 NOVEMBER 2018, ISNIN

SOALAN :

YB DATO' MANSOR BIN OTHMAN minta **MENTERI KERJA RAYA** menyatakan sama ada Kementerian mempunyai perancangan dalam masa terdekat untuk menangani isu trafik semakin serius di sepanjang jalan utama dalam kawasan Parlimen Nibong Tebal, terutama sekali selepas exit Tol Jawi menghala ke selatan.

JAWAPAN :

Tuan Yang Di-Pertua,

Untuk makluman Ahli Yang Berhormat, Kementerian Kerja Raya prihatin dan mengambil berat terhadap isu kesesakan di laluan tersebut. Sehubungan itu, pada RMKe-10 yang lalu antara langkah awal bagi mengatasi kesesakan lalu lintas di Jalan Persekutuan FT01, Kerajaan telah meluluskan projek Menaiktaraf Laluan Persekutuan FT001 Dari Persimpangan Permatang Keling (Seksyen 720) Ke Jambatan Di Atas Sg. Junjung, Simpang Ampat (Seksyen 740), Daerah Seberang Perai Selatan, Pulau Pinang (Fasa 5). Projek ini masih dalam peringkat pembinaan yang telah bermula pada 5 Disember 2017 dan dijangka siap pada 4 Disember 2020. Kemajuan kerja semasa projek adalah 21% (sebenar) berbanding 13% (jadual).

Selain itu juga, Kementerian ini telah mengangkat permohonan projek Membina Dan Menaiktaraf Jalan Dari Laluan Persekutuan FT001 Di Jawi Ke Persimpangan Bertingkat Jambatan Kedua Pulau Pinang, Seberang Perai Selatan semasa *Rolling Plan 1* (RP1) dan *Rolling Plan 2* (RP2), RMKe-11. Namun demikian, berdasarkan kepada keutamaan projek dan keperluan teknikal, cadangan projek tersebut tidak mendapat kelulusan Agensi Pusat dalam tempoh berkenaan.

Sekian, terima kasih.

SOALAN NO : 20

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB USTAZ ABDUL LATIFF BIN ABDUL RAHMAN

KAWASAN : KUALA KRAI

TARIKH : 26 NOVEMBER 2018, ISNIN

SOALAN :

YB USTAZ ABDUL LATIFF BIN ABDUL RAHMAN minta **MENTERI KERJA RAYA** menyatakan penyelesaian kepada kerosakan jalan KM11 Dabong-Sungai Sam yang masih berlarutan sehingga kini dan adakah Kementerian bercadang untuk menyelenggarakan Jalan Dabong-Jelawang yang beralun dan rosak teruk.

JAWAPAN :

Tuan Yang Di-Pertua,

Untuk makluman Ahli Yang Berhormat, bagi isu kerosakan jalan di KM11 Jalan Dabong – Sg. Sam iaitu di laluan jalan Persekutuan FT066 Seksyen 33.4, Kementerian telah mengambil maklum dan telah mengenal pasti kerosakan yang berlaku di sepanjang jalan tersebut. Kementerian juga telah menyediakan program penyenggaraan turapan dan kerosakan jalan ini telah dimasukkan ke dalam senarai keutamaan yang mendesak di dalam program penyenggaraan jalan persekutuan. Kementerian ini akan memberi perhatian terhadap perkara ini dan kerja-kerja pembaikan akan dilaksanakan setelah mendapat kelulusan peruntukan daripada Kementerian Kewangan.

Untuk makluman Ahli Yang Berhormat juga, berkaitan isu Jalan Dabong-Jelawang yang beralun dan rosak teruk, jalan tersebut adalah berstatus jalan negeri yang merupakan di bawah bidang kuasa Kerajaan Negeri Kelantan dan di bawah seliaan JKR negeri.

Sekian, terima kasih.

SOALAN NO : 21

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB TUAN TEH KOK LIM

KAWASAN : TAIPING

TARIKH : 26 NOVEMBER 2018, ISNIN

SOALAN :

YB TUAN TEH KOK LIM minta **MENTERI KERJA RAYA** menyatakan apakah tindakan yang akan diambil terhadap pihak kontraktor atas kelewatan tarikh persiapan Lebuhraya Pinggiran Pantai Barat seperti mana yang telah dijanjikan.

JAWAPAN :

Tuan Yang Di-Pertua,

Untuk makluman Ahli Yang Berhormat, berdasarkan perjanjian konsesi yang ditandatangani pada 2 Jan 2013, Projek Penswastaan Lebuhraya Pantai Barat (WCE) sepanjang 233km yang dilaksanakan oleh WCE Sdn. Bhd. akan mengambil tempoh masa 60 bulan pembinaan, iaitu perlu disiapkan sebelum 24 Ogos 2019.

Status kemajuan sehingga 31 Oktober 2018, kemajuan fizikal Projek WCE yang dicatatkan di tapak ialah 55% sahaja berbanding 87% seperti jadual. Hal ini berlaku disebabkan oleh faktor-faktor di luar kawalan pihak konsesi (WCE Sdn Bhd.) iaitu berpunca daripada isu proses pengambilan tanah dan isu penentuan jajaran di antara Persimpangan Asam Jawa ke Tanjong Karang, Selangor. Sehubungan itu pihak kementerian bersama dengan pihak konsesi sedang di dalam proses semakan semula jadual pembinaan lebuhraya ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' DR. MOHD KHAIRUDDIN BIN AMAN RAZALI
[KUALA NERUS]
TARIKH : 26 NOVEMBER 2018 (ISNIN)

SOALAN NO. 22

Y.B. DATO' DR. MOHD KHAIRUDDIN BIN AMAN RAZALI [KUALA NERUS] minta **MENTERI KEWANGAN** menyatakan senarai-syarikat dan agensi yang dipengerusikan oleh Menteri-menteri serta menyatakan gaji dan elaun yang diterima mereka dan menjelaskan usaha bagi menjimatkan perbelanjaan Kerajaan.

JAWAPAN

Tuan Yang Dipertua,

Untuk makluman Ahli Yang Berhormat, pelantikan Menteri sebagai Pengerusi di dalam Badan Berkanun Persekutuan (BPP) adalah berdasarkan ketetapan di dalam Akta Tubuh Badan Berkanun masing-masing. Sebagai contoh BPP di bawah seliaan Kementerian Kewangan iaitu Pihak Berkuasa Pelaksanaan Koridor Utara (NCIA) yang jelas menetapkan bahawa YAB Perdana Menteri sebagai Pengerusi. Manakala, bagi syarikat milik Menteri Kewangan Diperbadankan (MKD), pelantikan Menteri sebagai Pengerusi/Ahli Lembaga Pengarah (ALP) hanya dilaksanakan dalam Khazanah Nasional Berhad (KNB) sahaja memandangkan status sebagai *sovereign wealth fund* (SWF) negara. Pelantikan YAB Perdana Menteri sebagai Pengerusi KNB dan YB Dato' Seri Mohamed Azmin Ali, Menteri Hal Ehwal Ekonomi sebagai ALP dalam KNB telah dibuat pada 30 Julai 2018. Maklumat senarai Menteri berserta elaun bagi jawatan Pengerusi dalam syarikat MKD dan BBP seliaan Kementerian Kewangan adalah seperti di Lampiran I dan Lampiran II.

Sebagai sebahagian langkah penjimatan perbelanjaan Kerajaan, semakan semula bayaran gaji dan elaun Pengerusi/ALP syarikat-syarikat milik MKD akan dibuat berdasarkan penanda aras (*benchmark*) dalam pasaran. Kerajaan juga pada 7 Jun 2018 telah mengeluarkan arahan supaya ahli-ahli politik dalam Lembaga Pengarah syarikat-syarikat milik MKD dan BBP untuk meletakkan jawatan secara sukarela. Kerajaan dari masa ke masa berusaha untuk menambahbaik tadbir urus syarikat di samping mempertingkatkan kecekapan pengurusan kewangan.

LAMPIRAN I

SENARAI SYARIKAT MENTERI KEWANGAN DIPERBADANKAN (MKD) YANG DIPENGERUSIKAN OLEH YB MENTERI				

KHAZANAH NASIONAL BERHAD				
Bil.	Nama	Elaun Yang Diluluskan oleh MKD Setakat 15 Oktober 2018		
1	YAB. TUN DR. MAHATHIR MOHAMAD	Pengerusi: Mesyuarat Lembaga Pengarah : RM500 Mesyuarat Jawatankuasa Eksekutif (EXCO) : RM300 Mesyuarat Jawatankuasa Audit dan Risiko : RM300 Mesyuarat Jawatankuasa Pencalonan dan Ganjaran : RM300		
2	DATO' SERI MOHAMED AZMIN ALI	ALP: Mesyuarat Lembaga Pengarah : RM500 Mesyuarat Jawatankuasa Eksekutif (EXCO) : RM250 Mesyuarat Jawatankuasa Audit dan Risiko : RM250 Mesyuarat Jawatankuasa Pencalonan dan Ganjaran : RM250		

LAMPIRAN II

SENARAI BADAN BERKANUN DI BAWAH SELIAAN KEMENTERIAN KEWANGAN YANG DIPENGERUSIKAN OLEH YB MENTERI													
Bil.	Badan Berkanun Persekutuan	Singkatan	Pengerusi / Pengerusi Bersama	Rujukan Akta	Elaun Tetap Bulanan (RM)	Catatan	1	Pihak Berkuasa Wilayah Pembangunan Iskandar	IRDA	YAB Tun Dr. Mahathir Bin Mohamad (Perdana Menteri)	Seksyen 8, Akta Pihak Berkuasa Wilayah Pembangunan Iskandar 2007 [Akta 664]	5,000.00	Maklumat ETB setakat 8.10.2018
									YAB Datuk Osman Sapian (Menteri Besar Johor)				
2	Pihak Berkuasa Perlaksanaan Koridor Utara	NCIA	YAB Perdana Menteri	Seksyen 9, Akta Pihak Berkuasa Pelaksanaan Koridor Utara 2008 [Akta 687]	5,000.00	Maklumat ETB setakat 4.6.2018							
3	Majlis Pembangunan Wilayah Ekonomi Pantai Timur	ECERDC	YAB Perdana Menteri	Seksyen 10, Akta Majlis Pembangunan Wilayah Ekonomi Pantai Timur 2008 [Akta 688]	5,000.00	Maklumat ETB setakat 4.6.2018							

PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL PERTAMA
PARLIMEN KEEMPAT BELAS

PERTANYAAN : LISAN
DARIPADA : PUAN MARIA CHIN BINTI ABDULLAH
[PETALING JAYA]
TARIKH : 26 NOVEMBER 2018 (ISNIN)

SOALAN NO. 23

Puan Maria Chin Binti Abdullah [Petaling Jaya] minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada Kerajaan boleh mempertimbangkan Elaun Universal Asuhan Kanak-kanak yang telah dijalankan di beberapa negara serta dicadangkan dalam Laporan UNICEF 'Kanak-kanak Pinggiran' bagi menangani masalah sosial dan keluarga yang berkait rapat dengan isu kemiskinan.

JAWAPAN

Tuan Yang di-Pertua,

Kerajaan maklum akan salah satu cadangan untuk menyediakan “*Universal Child Care Allowance*” yang dikemukakan melalui kajian “*Children Without*” yang dilaksanakan oleh UNICEF pada tahun 2017. Kerajaan juga memandang serius penemuan serta cadangan-cadangan lain yang terdapat dalam laporan tersebut yang telah memfokuskan kepada perkembangan, pendidikan dan kesihatan kanak-kanak.

Bagi menangani isu yang dibangkitkan dalam kajian tersebut, Kerajaan mengambil langkah yang lebih holistik untuk kelangsungan hidup kanak-kanak bagi jangka masa yang lebih panjang iaitu dengan menyediakan Peta Laluan Kesejahteraan Kanak-Kanak Kebangsaan atau *National Children Well-Being Roadmap* (NCWR). Peta Laluan ini akan merangkumi tiga jenis intervensi, iaitu intervensi asas, intervensi pencegahan, dan intervensi reaktif berdasarkan lima (5) prinsip utama seperti berikut:

- a. Kesejahteraan kanak-kanak adalah pelaburan strategik untuk masa depan;
- b. Kanak-kanak tidak akan dinafikan peluang pelajaran dan kemudahan kesihatan;
- c. Kesejahteraan dan kesihatan kanak-kanak bermula dengan ibu-bapa mereka;
- d. Semua kanak-kanak berhak membesar dalam persekitaran yang selamat; dan
- e. Pembangunan kanak-kanak akan melibatkan keluarga dan komuniti mereka.

Beberapa siri konsultasi telah pun diadakan dan yang terkini, Peta Laluan ini sedang dimurnikan berdasarkan ulasan kementerian-kementerian yang terlibat. Seterusnya, konsultasi bersama NGO dan orang awam termasuklah kumpulan sasar iaitu kanak-kanak akan dijalankan. Buat masa ini, tiada perancangan untuk pemberian Elaun Universal Asuhan Kanak-kanak, tetapi golongan B40 akan diberi perhatian sewajarnya.

SOALAN NO. 23

Tuan Yang di-Pertua,

Kesejahteraan kanak-kanak di negara ini memerlukan penglibatan serta peranan semua pihak secara komprehensif bagi memastikan kanak-kanak diberi peluang mengembangkan potensi sepenuhnya lalu membuka masa depan yang cerah.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : DATUK WIRA HAJAH MAS ERMIEYATI
BINTI SAMSUDIN [MASJID TANAH]**

TARIKH : 26 NOVEMBER 2018 (ISNIN)

SOALAN : 24

PR-1412-L02770

Datuk Wira Hajah Mas Ermieyati binti Samsudin [Masjid Tanah] minta **MENTERI KOMUNIKASI DAN MULTIMEDIA** menyatakan jumlah bilangan laman web yang telah dikeluarkan dari sekatan sejak Pilihan Raya Umum Ke14.

JAWAPAN

Tuan Yang di-Pertua,

1. Untuk makluman Ahli Yang Berhormat, tindakan-tindakan penguatkuasaan yang dijalankan oleh Suruhanjaya Komunikasi dan Multimedia Malaysia (SKMM) adalah berasaskan aduan daripada masyarakat awam serta pihak yang terkesan, dan berlandaskan lunas-lunas perundangan sedia ada;

SOALAN NO: 24

2. Sekiranya terdapat mana-mana pihak atau individu melakukan sebarang bentuk tindak tanduk atau memuatnaik naik kandungan yang melanggar peruntukan undang-undang sedia ada, tindakan penguatkuasaan boleh diambil terhadap pihak atau individu yang berkenaan sekiranya ada aduan dibuat oleh individu atau kumpulan masyarakat yang terkesan.
3. Terdapat banyak Akta yang terpakai bagi menguatkuasakan undang-undang berkaitan dengan penyalahgunaan internet dan media sosial seperti Akta Fitnah 1957, Akta Hasutan 1948, Kanun Keseksaan, Akta Jenayah Komputer 1997, Akta Hak Cipta 1987 dan Akta Komunikasi dan Multimedia 1998 (Akta 588).
4. Tindakan sekatan yang dibuat oleh SKMM adalah berdasarkan aduan ataupun permintaan daripada agensi penguatkuasaan yang lain.
5. Bagi menjawab pertanyaan Yang Berhormat Ahli Parlimen Masjid Tanah, sejumlah **179** laman sesawang telah dibatalkan sekatan selepas Pilihanraya Umum Ke-14.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

DARIPADA : YB DATO' SRI LIOW TIONG LAI (BENTONG)

TARIKH : 26 NOVEMBER 2018

SOALAN : 25

Tuan Wong Tack [Bentong] minta MENTERI DALAM NEGERI menyatakan keberkesanan program 'amnesty' atas pendatang tanpa izin. Memandangkan tindakan tersebut meruncingkan lagi bekalan pekerja kepada beberapa industri, adakah langkah-langkah holistik akan diambil untuk menyelesaikan masalah tersebut termasuklah penambahbaikan sistem agensi pekerja asing.

JAWAPAN:

Tuan Yang Di Pertua,

Untuk makluman Yang Berhormat, mana-mana Pendatang Asing Tanpa Izin (PATI) boleh menyerahkan diri secara sukarela ke JIM dan kembali ke negara asal mereka melalui Program Penghantaran Pulang PATI Secara Sukarela (Program 3+1) yang telah tamat pada 30 Ogos 2018 tanpa sebarang pelanjutan.

Melalui program tersebut, mana-mana PATI yang menyerahkan diri secara sukarela akan dikenakan kompaun sebanyak RM300 dan bayaran Pas Khas sebanyak RM100 serta dikecualikan pendakwaan untuk kesalahan di bawah Akta Imigresen 1959/63 (Akta 155) dan Peraturan-Peraturan Imigresen. Mereka juga akan disenarai hitam daripada memasuki negara untuk tempoh lima tahun dan diambil rekod biometrik untuk rujukan JIM.

Statistik terkumpul oleh JIM menunjukkan seramai 874,480 orang PATI telah pulang ke negara asal melalui Program 3+1 sejak tahun 2016 sehingga 30 Ogos 2018 dan jumlah yang besar yang telah diusir keluar melalui Program ini menunjukkan bahawa tindakan yang dilaksanakan oleh JIM memberikan impak positif dalam membanteras PATI di dalam Negara.

Dasar utama penggajian masih menetapkan dan mengutamakan rakyat tempatan dan kehadiran pekerja asing di Negara ini hanyalah bagi mengisi jawatan-jawatan yang tidak dapat diisi oleh rakyat tempatan. Untuk makluman Yang Berhormat, pertimbangan ke atas permohonan penggajian pekerja asing oleh majikan dibuat secara objektif mengikut keperluan dan akhirnya kelayakan sebenar majikan, syarat dan nisbah kelayakan yang ditetapkan oleh Agensi Kawal Selia masing-masing serta dasar, prosedur dan syarat-syarat penggajian pekerja asing di Malaysia sebagaimana yang telah ditetapkan oleh Kementerian Tenaga Manusia.

Dalam hal ini, sebelum sesuatu permohonan penggajian pekerja asing oleh majikan dapat dipertimbangkan, majikan terlebih dahulu perlu mengemukakan permohonan kepada Jabatan Tenaga Kerja Semenanjung Malaysia, Kementerian Tenaga Manusia untuk mendapatkan sijil *Job Clearing System*. Sijil ini mempunyai tempoh sah laku selama tiga (3) bulan dan sebagai sijil sokongan kepada majikan yang memohon pekerja asing bagi memastikan kekosongan jawatan tersebut telah diiklankan dan tidak dapat diisi oleh rakyat tempatan. Setelah itu, majikan pada bila-bila masa dalam tempoh tiga (3) bulan mengikut kesesuaian perlu hadir untuk ditemu duga oleh Agensi Kawal Selia sektor masing-masing di Pusat Kelulusan Setempat, Kementerian Dalam Negeri. Selepas menjalani proses temu duga oleh Agensi Kawal Selia mengikut sektor, keputusan permohonan penggajian pekerja asing akan dimaklumkan kepada majikan pada hari yang sama. Pihak majikan seterusnya perlu melunaskan bayaran levi mengikut jumlah kuota pekerja asing dan sektor yang diluluskan sebelum membuat permohonan Visa Dengan Rujukan (VDR) bagi urusan membawa masuk pekerja asing.

Mengenai pertanyaan Yang Berhormat berhubung penambahbaikan sistem agensi pekerja asing, Kementerian Tenaga Manusia telah menambah baik pengurusan syarikat agensi pekerjaan swasta melalui pindaan Akta Agensi Pekerjaan Swasta (Pindaan) 2017 yang telah diluluskan oleh Kerajaan pada 14 Ogos 2017 dan dikuatkuasakan mulai 1 Februari 2018. Melalui pindaan Akta tersebut, peranan agensi pekerjaan swasta telah diperluaskan meliputi urusan merekrut dan menempatkan pekerja bukan warganegara termasuk pekhidmat domestik asing selain daripada urusan merekrut dan menempatkan pencari kerja warganegara di bawah peruntukan Akta sedia ada.

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATUK SYED ABU HUSSIN BIN
HAFIZ SYED ABDUL FASAL [BUKIT
GANTANG]**

TARIKH : 26 NOVEMBER 2018 (ISNIN)

SOALAN : 26

minta **MENTERI PEMBANGUNAN LUAR BANDAR** menyatakan langkah-langkah Majlis Amanah Rakyat (MARA) bagi menjaga kepentingan bumiputera dari aspek pembangunan ekonomi dan usaha Kerajaan mengurangkan jurang ekonomi antara kaum setelah MARA diletakan di bawah kementerian ini.

JAWAPAN

Tuan Yang di-Pertua,

Untuk makluman Yang Berhormat, Majlis Amanah Rakyat (MARA) telah ditubuhkan pada 1 Mac 1966 melalui Akta Parlimen sebagai sebuah Badan Berkanun hasil daripada resolusi Kongres Ekonomi Bumiputera Pertama di Kuala Lumpur pada Jun tahun 1965.

Objektif utama penubuhan MARA adalah untuk membangunkan usahawan berjaya dan inovatif, melahirkan modal insan global dan berintegriti, menyumbang kepada pemilikan ekuiti dan memudahkan sistem penyampaian kepada rakyat, khususnya golongan bumiputera. Sejak penubuhannya, fokus utama MARA adalah meningkatkan sosio ekonomi masyarakat bumiputera terutamanya di luar bandar melalui aktiviti keusahawanan dan pembangunan modal insan.

Antara langkah-langkah yang telah diambil oleh MARA bagi menjaga kepentingan bumiputera dari aspek pembangunan ekonomi dan usaha mengurangkan jurang ekonomi antara kaum antaranya melalui program yang berikut:

i. Program Memacu Ekosistem, Rangkaian dan Capaian Usahawan (MERCU)

MERCU yang bertemakan 'Aspirasi Keusahawanan Bumiputera' adalah program keusahawanan yang holistik dan komprehensif dengan menyasarkan penglibatan usahawan di semua peringkat sama ada mikro, kecil atau sederhana merangkumi keseluruhan komuniti keusahawanan Bumiputera. Program ini menawarkan 'Ekosistem Keusahawanan Lengkap' merangkumi pembangunan usahawan, pembangunan bisnes dan sokongan perniagaan dengan di tunjangi oleh modal insan yang ditawarkan oleh institusi pendidikan MARA. Seramai 2,494 orang usahawan telah menyertai MERCU peringkat zon selatan di MITC Melaka melalui pelbagai aktiviti seperti seminar keusahawanan, booth jualan, *business matching*, karnival *food truck* dan klinik usahawan.

ii. Program Wanita Inspirasi Ekonomi (WISE)

Program berupa seminar keusahawanan ini terbuka kepada semua wanita yang telah menceburi mahupun yang baharu dalam bidang keusahawanan. Objektif program ini ialah memberi pendedahan tentang *multitasking skills* dalam perniagaan selain meningkatkan potensi dan keupayaan usahawan wanita dalam melonjakkan perniagaan mereka ke tahap yang lebih baik, berdaya maju, berdaya saing dan berdaya tahan dalam dunia perniagaan global. Setakat September 2018, sebanyak 4 negeri telah melaksanakan WISE iaitu Negeri Sembilan, Pulau Pinang, Perlis, Selangor dengan penglibatan usahawan wanita seramai 1,586.

iii. Program Seminar Pewujudan dan Pemerkasaan Usahawan Profesional (PROSPEC)

MARA telah merangka strategi dalam usaha untuk mewujudkan usahawan dalam bidang profesional melalui ProSPEC yang mana dimulakan dalam bidang perubatan dengan memperkenalkan jaringan klinik di bawah satu jenama iaitu U.n.i Klinik. Program pembangunan usahawan ini merangkumi keseluruhan ekosistem keusahawanan yang merangkumi seminar, latihan keusahawanan, konsultasi dan khidmat nasihat, pinjaman perniagaan, promosi dan pemantauan prestasi syarikat. Jaringan U.n.i KLINIK yang diperkenalkan ini dilihat mampu menawarkan perkhidmatan premium di bawah satu sistem yang cekap dengan harga mampu milik serta dapat membantu negara mencapai nisbah perkhidmatan perubatan yang disasarkan dan memberikan peluang kepada pelajar perubatan yang telah tamat tempoh praktikal bekerja sendiri tanpa menunggu penempatan sebagai doktor awam yang pada masa ini memakan masa yang agak panjang. Seramai 40 doktor atau bakal usahawan telah dipilih sebagai peserta Usahawan ProSPEC dan akan mengikuti latihan keusahawanan atau Inkubator ProSPEC.

iv. Program Industrial Bootcamp (IBC)

Program ini merupakan inisiatif MARA dalam memperkasakan latihan kemahiran berdasarkan keperluan industri kepada belia Malaysia bagi meningkatkan kebolehpasaran dan terus ditawarkan pekerjaan. IBC digunakan sebagai alat yang berkesan bagi menyokong permintaan dan keperluan industri dan ianya selari dengan hasrat dan sokongan kerajaan menangani masalah pengangguran di kalangan belia.

Melalui program ini belia akan menerima sijil kompetensi yang diperlukan dan ini dapat meningkatkan kebolehpasaran dan terus ditawarkan pekerjaan. Sehingga kini seramai 205 orang pelatih sedang menjalani latihan manakala seramai 107 orang telah tamat latihan dan mula bekerja di 16 syarikat dengan pendapatan diperolehi antara RM1,650 hingga RM2,790 (pelatih berkelulusan peringkat sijil).

Selain daripada program di atas, program sedia ada yang dilaksanakan oleh MARA seperti latihan keusahawanan, kemudahan pembiayaan perniagaan dan penyediaan premis perniagaan MARA yang kondusif turut membantu pembangunan ekonomi masyarakat bumiputera di seluruh negara.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI WAN HASSAN BIN
MOHD RAMLI
[DUNGUN]**

TARIKH : 26 NOVEMBER 2018 (ISNIN)

SOALAN NO. 27

Minta **MENTERI BELIA DAN SUKAN** menyatakan peranan atau mekanisme Kementerian dalam mengekalkan semangat patriotik dan integrasi nasional setelah PLKN dihapuskan.

JAWAPAN

Yang di-Pertua,

1. Untuk makluman Ahli Yang Berhormat, berdasarkan Laporan Penilaian “Outcome” Indeks Belia Malaysia 2016 dan 2017 yang dikeluarkan oleh Institut Penyelidikan Pembangunan Belia Malaysia (IYRES) bagi Indikator Patriotisme berada pada tahap kurang memuaskan dan mengalami penurunan skor sebanyak 2.1 skor daripada 61.58 pada tahun 2016 kepada 59.48 pada tahun 2017. Begitu juga Domain Pembangunan Kendiri yang menggambarkan sahsiah dan jati diri belia berada pada tahap sederhana dan turut mengalami penurunan skor daripada 73.80 pada tahun 2016 kepada 72.19 pada tahun 2017. Dapatan ini juga selaras dengan Laporan Kajian Impak Program Latihan Khidmat Negara (PLKN) 2016 mendapati skor bagi Domain Pembangunan Kendiri dalam kalangan peserta PLKN pada tahun 2016 adalah 75.31 dan ia berada pada tahap memuaskan.
2. Justeru itu, Kementerian Belia dan Sukan (KBS) juga sedang merangka program baru bagi menggantikan program PLKN dan BTN. Program ini dirangka secara holistik dengan menggabungkan aktiviti *indoor* dan *outdoor* berimpak tinggi untuk menyerlahkan potensi anak muda sebagai rakan strategik dalam membangunkan negara berpandukan Perlembagaan Persekutuan dan Rukun Negara. Program ini akan memantapkan elemen seperti berikut:
 - I. Bina Semangat
 - II. Pembinaan Karakter/ Perwatakan
 - III. Integrasi Nasional

IV. Kenegaraan dan Jati Diri

V. Sosialisasi Politik

3. Untuk makluman ahli Yang Berhormat, KBS sedang menjalankan program perintis yang mengadaptasi Model *Youth Adventurous Course Outward Bound* yang menerapkan nilai kepimpinan, jati diri dan kenegaraan bermula November 2018 sehingga Disember 2018 yang melibatkan enam kohort. Kohort pertama melibatkan 30 orang belia berumur 15 sehingga 17 tahun telahpun dilaksanakan pada 1 sehingga 10 November 2018 di Kem Outward Bound Malaysia (OBM) Lumut, Perak. Bagi Kohort kedua dan ketiga akan melibatkan 690 peserta akan dilaksanakan pada bulan November dan Disember 2018 bertempat di Kem Outward Bound Malaysia (OBM) Lumut, Perak dan Outward Bound (OB) Kinarut, Sabah. Manakala bermula Kohort keempat iaitu pada bulan Disember, program ini akan dilaksanakan di beberapa buah Kem Bina Negara BTN dan Kompleks Rakan Muda di bawah KBS di Semenanjung Malaysia dan di Sarawak melibatkan 1,310 orang peserta. Jumlah keseluruhan peserta yang akan terlibat dengan projek rintis ini adalah seramai 2,000 orang peserta.
4. Segala dapatan dari kesemua siri pelaksanaan program perintis ini yang melibatkan empat kohort ini akan dijadikan panduan serta rujukan untuk merangka dan seterusnya melaksanakan program baru yang akan dilaksanakan secara menyeluruh bermula tahun 2019.

Sekian, Terima kasih.

PEMBERITAHUAN PERTANYAAN
DEWAN RAKYAT MALAYSIA
MESYUARAT KEDUA, PENGAL PERTAMA

PERTANYAAN : LISAN
DARIPADA : TUAN CHOW KON YEOW
KAWASAN : TANJONG
TARIKH : 26 NOVEMBER 2018

SOALAN

Tuan Chow Kon Yeow [Tanjong] minta MENTERI PERDAGANGAN ANTARABANGSA DAN INDUSTRI menyatakan jumlah pelaburan domestik dan asing bagi seluruh negara bagi suku tahun kedua termasuk senarai jenis-jenis pelaburan terlibat serta negara yang melabur.

JAWAPAN

Tuan Yang di-Pertua,

Bagi tempoh suku tahun kedua (April hingga Jun 2018), jumlah pelaburan yang diluluskan bernilai RM30.3 bilion meliputi pelaburan asing sebanyak RM8.5 bilion iaitu 28% dan pelaburan domestik sebanyak RM21.8 bilion iaitu 72%. Pelaburan ini melibatkan 1,083 projek dan akan menjana lebih daripada 23,000 peluang pekerjaan. Projek-projek yang diluluskan ini merangkumi projek di dalam sektor utama, perkilangan dan perkhidmatan.

Butir-butir pelaburan yang diluluskan dalam tempoh ini bagi sektor perkilangan dan perkhidmatan di bawah bidang kuasa Kementerian Perdagangan Antarabangsa dan Industri (MITI) / Lembaga Pembangunan Pelaburan Malaysia (MIDA) adalah seperti berikut:

Sektor Perkilangan

- (i) Jumlah pelaburan yang diluluskan di dalam sektor perkilangan bernilai RM7.8 bilion terdiri daripada RM2.8 bilion (36%) pelaburan domestik dan RM5.0 bilion (64%) pelaburan asing. Lima industri utama telah menyumbang sebanyak (RM5.3 bilion) iaitu 68% daripada jumlah keseluruhan pelaburan di dalam sektor perkilangan bagi tempoh tersebut adalah industri produk logam asas (RM2.8 bilion), kimia dan produk kimia (RM743.6 juta), produk petroleum (termasuk petrokimia) (RM613.1 juta), jentera dan kelengkapan (RM579.2 juta) dan kelengkapan pengangkutan (RM545.2 juta).
- (ii) Bagi pelaburan asing, Republik Korea mendahului lima pelabur asing utama dengan sumbangan pelaburan sebanyak RM2.3 bilion diikuti oleh Jepun (RM1.0 bilion), Singapura (RM0.5 bilion), Panama (RM0.4 bilion) dan Taiwan (RM0.2 bilion).

Sektor Perkhidmatan

- (iii) Jumlah pelaburan yang diluluskan di dalam sektor perkhidmatan di bawah bidang kuasa MIDA berjumlah RM1.9 bilion terdiri daripada RM1.1 bilion (58%) pelaburan domestik dan RM808.6 juta (42%) pelaburan asing. Sub-sektor utama yang menyumbang kepada pelaburan adalah perkhidmatan sokongan (RM1.1 bilion), hotel dan pelancongan (RM676.5 juta) dan pertubuhan serantau (RM178.9 juta).
- (iv) Bagi pelaburan asing, negara Singapura merupakan antara pelabur asing utama dengan sumbangan pelaburan berjumlah RM418.7 juta diikuti oleh Taiwan (RM212.1 juta), Republik Korea (RM15.2 juta) dan Thailand (RM10.5 juta).

Sekian, terima kasih

**PEMBERITAHU PERTANYAAN
DEWAN RAKYAT, MALAYSIA**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : ISNIN, 26 NOVEMBER 2018

RUJUKAN : L6 [PR-1412-L01876]

SOALAN :

Tuan Ahmad Fadhli bin Shaari [Pasir Mas] minta **MENTERI WILAYAH** menyatakan apakah justifikasi pengharaman straw plastik di Wilayah Persekutuan

JAWAPAN

Tuan Yang di-Pertua,

Untuk makluman Yang Berhormat, isu pencemaran alam sekitar yang berpunca daripada polistirena, *single-use plastics* termasuk straw plastik merupakan masalah pencemaran global. Menurut satu kajian saintifik yang diterbitkan oleh jurnal *Science* pada tahun 2015, Malaysia berada di tangga ke-8 dalam tahap pencemaran sisa plastik yang tidak diurus dengan berkesan. Menurut kajian tersebut, Malaysia menghasilkan hampir 4,000 tan metrik sisa buangan plastik konvensional termasuk *straw* dalam sehari. Dianggarkan 15 hingga 40 peratus daripada sisa buangan tersebut akan hanyut ke perairan, sama ada ke sungai ataupun laut.

Larangan penggunaan *straw* plastik di Wilayah Persekutuan adalah selaras dengan inisiatif global bagi mengurangkan kesan negatif kepada alam sekitar, kesihatan masyarakat dan hidupan. Ini adalah kerana *straw* dan bahan buangan plastik konvensional yang berasaskan petroleum mengambil masa yang lama untuk terurai dengan julat kitar hayat antara 20 tahun hingga 500 tahun mengikut jenis produk. Selain penguraian dalam tempoh yang panjang, sisa plastik ini juga akan meninggalkan bahan buangan berbentuk partikel *microplastic* yang merbahaya kepada alam sekitar dan kehidupan.

Walaupun terdapat kesan negatif terhadap alam sekitar, Kerajaan Pakatan Harapan tidak menafikan bahawa industri plastik merupakan penyumbang yang signifikan kepada ekonomi negara. Statistik daripada *Malaysian Plastics Manufacturers Association* dan Jabatan Perangkaan Malaysia pada tahun 2016 merekodkan bahawa terdapat 1,300 pengilang di seluruh Malaysia yang terlibat di dalam industri ini dan telah menyumbang sebanyak 79,000 peluang pekerjaan serta menghasilkan jumlah eksport yang bernilai RM 13.12 bilion setahun.

SOALAN NO: 29

Sebagai kerajaan yang prihatin kepada kesejahteraan rakyat dan bertanggungjawab untuk memacu ekonomi negara, maka isu pencemaran plastik konvensional ini akan ditangani melalui pendekatan yang holistik. Pendekatan ini telah mengambil kira kepentingan awam, kesan kepada ekonomi dan kelestarian alam sekitar.

Kerajaan Pakatan Harapan tidak terburu-buru untuk mengharamkan terus penggunaan straw plastik ini sebaliknya akan melaksanakan larangan ini secara berperingkat. Penguatkuasaan penuh larangan penggunaan straw plastik hanya akan dikuatkuasakan pada 1 Januari 2020. Kempen-kempen kesedaran berhubung kesan negatif penggunaan straw plastik ini akan dilaksanakan sepanjang tahun 2019 sehingga penguatkuasaan sepenuhnya dilaksanakan pada 1 Januari 2020. Tempoh setahun diharapkan mencukupi bagi memberi kesedaran kepada masyarakat dan pengeluar untuk memenuhi permintaan rakyat dengan mengeluarkan straw daripada bahan mesra alam seperti straw daripada bahan-bahan biodegradasi dan kertas serta pengeluaran straw yang boleh diguna semula (*reusable*) yang diperbuat daripada besi.

Kerajaan juga prihatin terhadap keperluan golongan kurang upaya dan pesakit yang memerlukan straw dan bahan-bahan plastik dalam kehidupan mereka. Oleh itu, mereka akan dikecualikan daripada sebarang tindakan. Bagi memastikan industri plastik tidak terjejas dan terus berkembang, kerajaan menggalakkan pemain di dalam industri ini untuk meneroka alternatif baru dalam pembuatan plastik dengan menggantikan bahan-bahan *hydrocarbon* kepada bahan semulajadi dan mesra alam untuk menjamin kelestarian alam sekitar dan kesejahteraan rakyat.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : YB TUAN SIVAKUMAR VARATHARAJU
NAIDU**

TARIKH : 26 NOVEMBER 2018 (ISNIN)

SOALAN : 30

Tuan Sivakumar Varatharaju Naidu (Batu Gajah) minta **PERDANA MENTERI** menyatakan reformasi Parlimen yang telah dan akan dilaksanakan oleh Kerajaan baharu. Bagaimanakah Kerajaan akan memperkasakan Ahli - Ahli Parlimen dari segi bantuan penyelidikan, kemudahan-kemudahan fizikal dan sumber tenaga manusia yang mencukupi supaya dapat memberi perkhidmatan yang cemerlang kepada rakyat dan institusi Parlimen itu sendiri.

JAWAPAN: YB TUAN MOHAMED HANIPA MAIDIN

TIMBALAN MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat,

Selaras dengan Manifesto Pakatan Harapan melalui Janji 16 : Mengembalikan Wibawa Institusi Parlimen, Kerajaan sedang mengkaji dengan teliti pelbagai cadangan untuk melaksanakan reformasi Parlimen.

Antara reformasi Parlimen yang telah dilaksanakan adalah:

- i. Melantik Ahli Parlimen Pembangkang sebagai Pengerusi Jawatankuasa Kira-Kira Wang Negara (PAC); dan
- ii. Menubuhkan enam (6) Jawatankuasa Pilihan Khas sebagai perintis berdasarkan hala tuju negara iaitu:
 - a. Jawatankuasa Pilihan Khas Menimbang Rang Undang-Undang;
 - b. Jawatankuasa Pilihan Khas Bajet;
 - c. Jawatankuasa Pilihan Khas Pertahanan dan Hal Ehwal Dalam Negeri;
 - d. Jawatankuasa Pilihan Khas Hak Asasi dan Kesaksamaan Gender;
 - e. Jawatankuasa Pilihan Khas Hubungan Antara Negeri-Negeri Persekutuan; dan

f. Jawatankuasa Pilihan Khas Untuk Melantik Jawatan-Jawatan Utama Perkhidmatan Awam.

Manakala, antara reformasi Parlimen yang sedang dikaji dengan teliti adalah cadangan Jawatankuasa Dewan, Majlis Dewan Rakyat Parlimen Keempat Belas pada hari Rabu, 17 Oktober 2018 bagi mewujudkan Akta Suruhanjaya Perkhidmatan Parlimen menggantikan Akta Perkhidmatan Parlimen 1963 agar pengurusan sumber manusia di Parlimen dapat berfungsi dengan lebih efektif. Dalam hubungan ini, Bahagian Penyelidikan dan Perpustakaan Parlimen telah ditubuhkan pada tahun 2005. Pada hari ini, Bahagian Penyelidikan dan Perpustakaan mempunyai 1 Setiausaha Bahagian dan 14 Pegawai Penyelidik. Objektif penubuhan Bahagian Penyelidikan dan Perpustakaan Parlimen adalah untuk membantu ahli-ahli Parlimen dalam perbahasan di dalam Dewan Rakyat dan Dewan Negara.

Selari matlamat perkhidmatan penyelidikan Parlimen di peringkat antarabangsa, perkhidmatan penyelidikan adalah bersifat objektif dan non-partisan. Antara jenis perkhidmatan penyelidikan yang disediakan oleh Bahagian Penyelidikan dan Perpustakaan Parlimen adalah:

- 1) Menyediakan dan menganalisis maklumat penyelidikan untuk ahli-ahli parlimen untuk tujuan perbahasan.
- 2) Menyediakan ulasan rang undang-undang yang dibentangkan di Parlimen,
- 3) Menyediakan nota ikhtisar dan percakapan apabila ahli-ahli Parlimen mewakili Parlimen Malaysia ke persidangan di peringkat antarabangsa seperti Inter-Parliamentary Union (IPU),

Commonwealth Parliamentary Association (CPA), Asian Inter-Parliamentary Assembly (AIPA) dan sebagainya.

Di samping itu, Parlimen Malaysia juga telah mengambil kira kemudahan-kemudahan kepada Ahli-Ahli Parlimen dalam Projek Fasa 3B yang dijangka siap pada Ogos 2019. Antara kemudahan yang disediakan ialah:

- i) Perpustakaan
- ii) Bilik/Ruang Kerja
- iii) *Business Lounge*
- iv) *MP Lounge*
- v) Bilik Jamuan

**PEMBERITAHUAN PERTANYAAN
DEWAN RAKYAT, MALAYSIA
MESYUARAT KEDUA, PENGGAL PERTAMA**

PERTANYAAN : LISAN
DARIPADA : TUAN HAJI AHMAD AMZAD BIN
MOHAMED @ HASHIM
KAWASAN : KUALA TERENGGANU
TARIKH : 26 NOVEMBER 2018
NO. SOALAN : 31

SOALAN

Tuan Haji Ahmad Amzad bin Mohamed @ Hashim [Kuala Terengganu] minta **MENTERI PERDAGANGAN ANTARABANGSA DAN INDUSTRI** menyatakan pendirian Kerajaan berhubung *Comprehensive and Progressive Agreement for the Trans-Pacific Partnership* (CPTPP).

JAWAPAN

Tuan Yang di-Pertua,

Kerajaan Malaysia masih memerlukan masa untuk meneliti Perjanjian ini dan memastikan sebarang keputusan yang diambil mengenai CPTPP akan memberi kebaikan kepada Malaysia secara keseluruhannya.

Sekian, terima kasih.

SOALAN NO : 32

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB DATO' SRI MUSTAPA BIN MOHAMED

KAWASAN : JELI

TARIKH : 26 NOVEMBER 2018, ISNIN

SOALAN :

YB DATO' SRI MUSTAPA BIN MOHAMED minta **MENTERI KERJA RAYA** menyatakan sama ada Kerajaan bercadang untuk menaik taraf Lebuhraya Timur Barat dari Gerik ke Pasir Puteh yang telah berusia lebih 35 tahun bagi menampung pertambahan trafik khususnya semasa musim perayaan.

JAWAPAN :

Tuan Yang Di-Pertua,

Untuk makluman Ahli Yang Berhormat, Lebuhraya Timur Barat dari Gerik ke Pasir Puteh yang dimaksudkan ialah Jalan Persekutuan FT04. Berdasarkan semakan melalui dua (2) stesen bancian dan isipadu trafik lalulintas terkini mendapati bahawa Tahap Perkhidmatan Jalan (*Level of Service, LOS*) berada pada tahap LOS A iaitu aliran trafik bebas dan lancar. Sehubungan dengan itu, tiada keperluan untuk menaiktaraf jalan tersebut pada masa kini memandangkan aliran trafik pada jalan sedia ada masih lancar serta masih lagi mampu menampung kapasiti jalan sedia ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : DATO' SERI HAJI ABDUL HADI BIN AWANG
[MARANG]
TARIKH : 26 NOVEMBER 2018 (ISNIN)

SOALAN NO. 33

Minta **MENTERI KESIHATAN** menyatakan apakah langkah kementerian untuk membendung gejala meminum arak dan membahayakan nyawa sendiri dan orang ramai

JAWAPAN

Yang di-Pertua,

Kementerian Kesihatan Malaysia (KKM) telah mewujudkan Pelan Tindakan Alkohol, Pencegahan dan Pengurangan Kemudaratan Alkohol bagi tahun 2013 hingga 2020. Di dalam pelan tindakan ini telah menggariskan strategi dan aktiviti pencegahan dan kawalan kemudaratan berkaitan pengambilan alkohol berdasarkan kepada garis panduan yang telah ditetapkan oleh Pertubuhan Kesihatan Sedunia (*WHO*) bagi mengurangkan masalah kesihatan dan sosial akibat pengambilan alkohol ini. Matlamat yang telah ditetapkan di dalam Pelan Tindakan Alkohol ini adalah supaya rakyat Malaysia menjadi celik kesihatan dan mengamalkan gaya hidup sihat iaitu "SIHAT TANPA ALKOHOL" untuk mencegah dan mengurangkan kemudaratan alkohol kepada diri sendiri, keluarga dan masyarakat.

Di dalam pelan ini juga digariskan kordinasi aktiviti pencegahan dan kawalan kemudaratan alkohol bersama-sama dengan agensi kerajaan yang lain seperti Kementerian Dalam Negeri (Polis DiRaja Malaysia (trafik) yang menguatkuasakan Akta Pengangkutan Jalan 1987 iaitu larangan memandu di bawah pengaruh alkohol, Larangan pengiklanan siaran kerajaan dan larangan iklan media cetak untuk akhbar berbahasa Melayu, Jabatan Kastam DiRaja Malaysia (Akta Eksais dan Peraturan-peraturan Penjualan Likuor yang memabukkan, Akta Membaharui Undang-undang (Penghapusan Samsu Gelap) 1976, Pihak Berkuasa Tempatan (PBT) dalam penguatkuasaan Akta Kerajaan Tempatan 1976 dan peraturan-peraturan berkaitan lesen premis perniagaan, waktu jualan minuman beralkohol dan mengurus dan memantau kebersihan premis menjual minuman beralkohol, Jabatan Kemajuan Islam Malaysia (melalui Jabatan Agama Islam Negeri) yang mentabir isu berkaitan meminum alkohol dalam kalangan umat Islam dan beberapa agensi lain yang berkaitan.

Kementerian Kesihatan Malaysia (KKM) pula bertanggungjawab dalam menganjur dan menyedarkan masyarakat berkaitan amalan gaya hidup

sihat iaitu "SIHAT TANPA ALKOHOL", menyediakan perkhidmatan saringan dan intervensi alkohol di fasiliti-fasiliti kesihatan dan juga aktiviti saringan dan intervensi di dalam komuniti seperti di perkampungan Orang Asli dan juga penempatan yang mempunyai masyarakat yang mengamalkan peminuman alkohol terutamanya di Sabah dan Sarawak. Selain itu, KKM juga mengawal kebolehdapatan minuman beralkohol ini dengan menguatkuasakan Akta Makanan 1983 di bawah Peraturan-peraturan Makanan 1985 (Pindaan 2016) dengan melarang penjualan minuman beralkohol kepada mereka yang berumur bawah 21 tahun, pengasingan minuman beralkohol dengan makanan-makanan yang lain, mewajibkan tanda amaran kesihatan pada setiap pembungkusan minuman beralkohol dan juga pematuhan perlabelan pada pembungkusan minuman tersebut.

Sebagai penambahbaikan, Kementerian Kesihatan Malaysia akan mempertingkatkan usaha menyedarkan masyarakat untuk pengamalan gaya hidup sihat "SIHAT TANPA ALKOHOL" melalui pelbagai *platform* dan media iaitu melalui media konvensional, media sosial, penerbitan bahan pendidikan melalui laman web www.infosihat.gov.my dan www.myhealth.gov.my serta menyediakan perkhidmatan saringan dan intervensi alkohol yang berkualiti. KKM juga akan mempertingkatkan penguatkuasaan Akta Makanan 1983 Peraturan-peraturan Makanan (Pindaan 2016) 1985 dalam mengawal kebolehdapatan minuman beralkohol kepada masyarakat.

SOALAN NO : 34

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB DATO' SERI DR. EDMUND SANTHARA

KAWASAN : SEGAMAT

TARIKH : 26 NOVEMBER 2018, ISNIN

SOALAN :

YB DATO' SERI DR. EDMUND SANTHARA minta **MENTERI KERJA RAYA** menyatakan apakah perancangan untuk menyiapkan lebuh raya 2 hala dari Kuantan ke Segamat dan dari Segamat ke Yong Peng dan Tangkak.

JAWAPAN :

Tuan Yang Di-Pertua,

Untuk makluman Ahli Yang Berhormat, Cadangan Menaiktaraf Laluan Persekutuan FT12, bermula dari Persimpangan Gambang sehingga ke Persimpangan Bandar Segamat, Johor sepanjang 147km. Projek ini telah diluluskan Fasa 1 oleh Agensi Pusat dalam *Rolling Plan* 3 (RP3), RMKe-10. Fasa 1 kini adalah dalam peringkat pembinaan yang melibatkan jajaran 47km dari Persimpangan Gambang ke Persimpangan Chini dengan kos kontrak semasa iaitu RM427.56 juta. Projek ini yang telah bermula pada 25 Ogos 2015 dan dijangka siap pada 18 Mei 2019. Kemajuan kerja semasa projek adalah 78.21% (sebenar) berbanding 79.53% (jadual).

Sementara itu, permohonan bagi Fasa 2 yang melibatkan jajaran dari Persimpangan Chini ke Persimpangan Bandar Segamat dengan jarak 100 km tidak diluluskan oleh Agensi Pusat dalam *Rolling Plan* 1 (RP1), RMKe-11.

Manakala bagi Projek Menaiktaraf Jalan Segamat – Tangkak pula, projek ini terbahagi kepada 7 pakej iaitu Pakej 1A, 1B, 2, 3, 4, 5 dan 6. Dua pakej telah pun siap iaitu Pakej 1B dan Pakej 2. Manakala Pakej 3 masih dalam fasa pembinaan. Pelaksanaan jajaran seterusnya iaitu pakej 1A, 4, 5 dan 6 dan adalah secara berperingkat mengikut keutamaan, bergantung kepada kelulusan Agensi Pusat serta keadaan kewangan semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN STEVEN CHOONG SHIAU
YOON [TEBRAU]**

TARIKH : 26 NOVEMBER 2018 [ISNIN]

SOALAN NO. 35

Minta **MENTERI PERUMAHAN DAN KERAJAAN TEMPATAN** menyatakan tahap kesediaan Kementerian menjalankan **pilihanraya Kerajaan Tempatan** di seluruh negara, atau **adakah Kerajaan Negeri masing-masing dibenarkan menggunakan jentera sendiri untuk menjalankan pilihanraya sedemikian.**

JAWAPAN

Yang di-Pertua,

1. Untuk makluman Ahli Yang Berhormat, Kementerian Perumahan dan Kerajaan Tempatan (KPKT) sedang membuat persediaan untuk melaksanakan Pilihan Raya Kerajaan Tempatan yang akan dilaksanakan dalam tempoh 3 tahun, iaitu pada tahun 2021. KPKT berpandangan Pilihan Raya Kerajaan Tempatan perlu dilaksanakan untuk memberi peluang kepada rakyat melibatkan diri dalam proses pemilihan pemimpin di peringkat Kerajaan Tempatan.
2. Untuk makluman Ahli Yang Berhormat, Kementerian masih dalam tahap awal kajian kebolehlaksanaan Pilihan Raya Kerajaan Tempatan. Oleh yang demikian, sama ada Kerajaan Negeri dibenarkan untuk melaksanakan pilihan raya ini akan ditentukan setelah Kementerian meneliti hasil kajian kebolehlaksanaan pilihan raya yang dijangka siap pada penghujung tahun 2018.
3. Pada masa kini, KPKT sedang mengkaji kebolehlaksanaan Pilihan Raya Kerajaan Tempatan. Antara tindakan yang diambil adalah:
 - (i) Mewujudkan satu Jawatankuasa di peringkat KPKT bagi membuat kajian awal terhadap cadangan pelaksanaan pilihan raya merangkumi implikasi perundangan, mekanisme pilihan raya dan keperluan kewangan;
 - (ii) Mengadakan sesi libat urus (*engagement*) dengan agensi yang terlibat seperti Suruhanjaya Pilihan Raya Malaysia (SPR), Kementerian Kewangan (MoF), Jabatan Peguam

Negara (AGC), Kerajaan Negeri, Pihak Berkuasa Tempatan (PBT) dan agensi-agensi lain bagi mendapatkan input yang berkaitan bagi pelaksanaan pilihan raya Kerajaan Tempatan; dan

- (iii) Mengkaji amalan terbaik pelaksanaan Pilihan Raya Kerajaan Tempatan di negara lain untuk dijadikan panduan pelaksanaan pilihan raya. KPKT akan menjemput pakar-pakar dari luar untuk berkongsi amalan terbaik pelaksanaan Pilihan Raya Kerajaan Tempatan dalam konvensyen PBT yang akan dianjurkan pada akhir November 2018.

Sekian, terima kasih.

**PEMBERITAHUAN PERTANYAAN
MESYUARAT KEDUA, PENGAL PERTAMA
PARLIMEN KEEMPAT BELAS (2018)
DEWAN RAKYAT**

PERTANYAAN : **LISAN**
DARIPADA : **TUAN AHMAD BIN HASSAN [PAPAR]**
TARIKH : **26 NOVEMBER 2018 | ISNIN**

SOALAN :

Tuan Ahmad Bin Hassan [Papar] minta **Perdana Menteri** menyatakan memandangkan kawasan Parlimen Papar terdapat ramai penduduk beragama Islam, sama ada Lembaga Tabung Haji bercadang membuka satu cawangan baharu Tabung Haji di Pekan Papar.

JAWAPAN : **(MENTERI DI JABATAN PERDANA MENTERI)**

Tuan Yang Di-Pertua,

Lembaga Tabung Haji (**TH**) mempunyai sebanyak 126 buah cawangan di seluruh negara, termasuklah 9 buah cawangan di Negeri Sabah pada masa kini. Perkhidmatan yang ditawarkan di cawangan-cawangan ini merangkumi urusan pembukaan akaun, simpanan dan pengeluaran, mengemaskini akaun, pendaftaran haji, hibah amanah, penamaan waris dan sebagainya.

Untuk makluman Ahli Yang Berhormat juga, **TH** telah mengadakan penambahan rangkaian-rangkaian perkhidmatan sehingga lebih daripada 9,000 *touch points* dengan menjalin kerjasama strategik bersama Bank Islam Malaysia Berhad (BIMB), Bank Kerjasama Rakyat Malaysia Berhad (BKRM) dan Maybank Islamic Berhad (MIB) dan CIMB Islamic Bank Berhad (CIMB) dengan menyediakan kemudahan kepada para pendeposit menjalankan transaksi simpanan dan pengeluaran melalui 'Auto Teller Machine' (ATM) dan Mesin Deposit Tunai (Cash Deposit Machine – CDM) serta perkhidmatan **TH** (uniteller) di Cawangan BIMB dan BKRM.

NO. SOALAN: 36

Di Pekan Papar, terdapat kemudahan ATM/CDM CIMB yang disediakan bagi memudahkan pendeposit **TH** melakukan transaksi simpanan dan pengeluaran **TH**. Penduduk dan para pendeposit juga boleh menggunakan perkhidmatan **TH** yang disediakan di cawangan-cawangan berhampiran seperti Cawangan **TH** Kota Kinabalu dengan jarak 50 km dan Cawangan **TH** Beaufort dengan jarak 55 km dari Pekan Papar.

Selain itu, **TH** juga telah melantik agen-agen kutipan dengan beberapa buah bank dan institusi bagi membolehkan para pendeposit di kawasan berkenaan membuat urusan transaksi simpanan di kaunter cawangan agen-agen kutipan tersebut. Penduduk dan pendeposit di Pekan Papar bolehlah berurusan dengan agen-agen yang tertera seperti berikut:

Bil	Agen Kutipan	Perkhidmatan ditawarkan
1	Pejabat Pos Malaysia Berhad, Taman OKK Mahali, Papar	Kaunter Simpanan (Tunai) Pos online
2	Public Bank Berhad, Jalan Besar Pekan Papar	Internet banking ATM – Pindahan Simpanan ke Akaun TH Standing Instruction (SI)
3	Bank Simpanan Nasional, Jalan Papar	Kaunter Simpanan (Tunai) ATM - Pindahan Simpanan ke Akaun TH Standing Instruction (SI) Internet banking

TH juga telah melancarkan Perkhidmatan **TH** Komuniti pada tahun 2016 sebagai saluran perkhidmatan tambahan bergerak (*Mobile Branch*) untuk umat Islam mendapatkan perkhidmatan daripada **TH**. Perkhidmatan bergerak ini disediakan bagi memberi kemudahan untuk pendeposit **TH** di luar bandar. **TH** telah menempatkan 2 unit kenderaan **TH** Komuniti di Negeri Sabah. Buat masa ini **TH** Komuniti berada di Pekan Papar dan Lok Kawi pada hari Khamis dan di Pekan Bongawan dan Kinarut pada hari Sabtu.

Sehubungan dengan itu, pada masa kini, **TH** tidak berhasrat untuk membuka cawangan baharunya di Pekan Papar, Sabah. Para penduduk dan pendeposit boleh menggunakan perkhidmatan-perkhidmatan sepertimana yang telah dinyatakan di atas.

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : PUAN NOORITA BINTI SUAL
[TENOM]**

TARIKH : 26 NOVEMBER 2018 (ISNIN)

SOALAN : 37

minta **MENTERI PEMBANGUNAN LUAR BANDAR** menyatakan status Projek Bekalan Elektrik Luar Bandar (BELB) di kawasan Mukim Rundum membabitkan kampung seperti Kampung Rundum, Kampung Kapulu, Kampung Korolok serta Kampung Abingkoi.

JAWAPAN

Tuan Yang Di-Pertua,

Untuk makluman Yang Berhormat, Kementerian sedang melaksanakan projek Bekalan Elektrik Luar Bandar (BELB) penyambungan talian grid melibatkan Kampung Kapulu dan Kampung Korolok dengan kos berjumlah RM8.1 juta. Projek ini turut melibatkan Kampung Katubu, Kampung Patian Tengah dan Kampung Ahuron. Projek ini dijangka akan selesai pada Disember 2018 dan apabila siap kelak sebanyak 192 buah rumah akan mendapat bekalan elektrik.

Untuk makluman Yang Berhormat juga, berdasarkan semakan, Kampung Abingkoi tidak terdapat di dalam senarai perancangan yang dikemukakan oleh pihak Unit Perancang Ekonomi Negeri (UPEN) Sabah. Kementerian akan mengemukakan permohonan ini kepada pihak UPEN Sabah untuk semakan dan dimasukkan ke dalam perancangan pihak Kerajaan Negeri.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : DATO' SRI ABDUL AZEEZ BIN ABDUL RAHIM
[BALING]
TARIKH : 26 NOVEMBER 2018 (ISNIN)

SOALAN NO. 38

Minta **MENTERI KESIHATAN** menyatakan sebab peningkatan graduan lulusan perubatan yang masih menganggur. Nyatakan statistik jumlah graduan lulusan perubatan yang telah berkhidmat di hospital Kerajaan di seluruh negara.

JAWAPAN

Yang di-Pertua,

Untuk makluman Ahli Yang Berhormat, antara faktor peningkatan graduan lulusan perubatan yang masih belum ditawarkan slot latihan siswazah adalah seperti berikut:

- i. Peningkatan keluaran graduan perubatan dari dalam dan luar negara yang dianggarkan sebanyak 5,000 hingga 6,000 orang setahun berbanding penawaran slot latihan siswazah yang terhad di Hospital Latihan Siswazah sebanyak 11,706 slot latihan; dan
- ii. Berlakunya *backlog* kerana slot-slot latihan sedia ada mengambil masa yang lebih lama untuk dikosongkan berikutan hanya seramai 67.1% Pegawai Perubatan Siswazah (PPS) sahaja yang berjaya menamatkan latihan siswazah dalam tempoh 2 tahun manakala 32.9% PPS lagi mengambil masa yang lebih lama untuk menamatkan latihan siswazah kerana faktor peribadi dan kompetensi.

Walau bagaimanapun, Kementerian Kesihatan Malaysia (KKM) telah melaksanakan inisiatif untuk mempercepatkan lantikan graduan lulusan perubatan tersebut iaitu meningkatkan bilangan Hospital Latihan Siswazah (HLS) dari 38 HLS pada tahun 2009 kepada 47 buah HLS pada tahun 2018 dan tambahan bilangan penempatan alternatif daripada 5 penempatan kepada 9 penempatan di Klinik-klinik Kesihatan dan Institusi Kesihatan Mental. Melalui pendekatan ini, slot latihan siswazah di KKM dapat ditingkatkan daripada 10,835 pada tahun 2013 kepada 11,706 pada tahun 2018.

Untuk makluman Ahli yang Berhormat juga, pada 5 September 2018 yang lalu, Kerajaan telah bersetuju dengan transformasi program Pegawai Perubatan Siswazah di Malaysia menerusi pelaksanaan *High Performance Housemanship Programme* bagi mempercepatkan pengosongan slot latihan siswazah untuk diisi graduan perubatan lantikan

NO SOALAN: 38

baharu. Pada masa kini, tempoh masa menunggu untuk graduan perubatan dilantik untuk menjalani latihan siswazah adalah selama 8-12 bulan.

Pada masa ini, Kementerian sedang dalam poses memuktamadkan tatacara pelaksanaan *High Performance Housemanship Programme*. Program ini dicadang untuk dilaksanakan kepada kohort lantikan kontrak PPS yang pertama bagi tahun 2019. Melalui program ini, dijangka 10% PPS yang cemerlang dari setiap kohort lantikan atau anggaran 500 orang akan menamatkan latihan siswazah dalam tempoh 20 bulan. Walaubagaimanapun baki 90% PPS masih perlu meneruskan latihan siswazah selama dua tahun.

Setakat 31 Oktober 2018, seramai 11,737 orang Pegawai Perubatan Siswazah sedang menjalani latihan siswazah di Hospital Latihan Siswazah di seluruh negara, dimana seramai 11,047 daripadanya merupakan graduan perubatan yang telah dilantik sebagai Pegawai Perubatan Gred UD41 secara kontrak bagi tujuan menjalani latihan siswazah/ khidmat wajib.

PEMBERITAHUAN PERTANYAAN LISAN

DEWAN RAKYAT MESYUARAT KEDUA, PENGGAL PERTAMA,

PARLIMEN KEEMPAT BELAS

PERTANYAAN : LISAN

**DARIPADA : Y.B.TUAN AHMAD FAIZAL BIN DATO' AZUMU
[TAMBUN]**

TARIKH : 26 NOVEMBER 2018 (ISNIN)

SOALAN NO. 39

Y.B.TUAN AHMAD FAIZAL BIN DATO' AZUMU [TAMBUN] minta **MENTERI KEWANGAN** menyatakan bahagian selatan negeri Perak sedang rancak dibangunkan dengan “glove city” di Bidor dan projek pembesaran kilang Proton di Tanjung Malim. Bolehkah Kerajaan Persekutuan mengembangkan rangkaian paip gas asli sedia ada di Changkat Jong atau Lembah Kinta, ke Bidor dan Tanjung Malim secara usaha sama bersama Gas Malaysia Berhad menerusi pendekatan “Private-Public Partnership”.

JAWAPAN

Tuan Yang di-Pertua,

Untuk makluman Ahli Yang Berhormat, Projek Rangkaian Paip Penyaluran Gas Industri yang sedang dilaksanakan lebih kepada secara “Business to Business” (B2B). Buat masa kini Kerajaan Persekutuan belum bercadang untuk mengembangkan Projek Rangkaian Paip Penyaluran Gas Industri sedia ada di Changkat Jong atau di Lembah Kinta ke Bidor dan Tanjung Malim secara usaha sama bersama pihak Gas Malaysia Berhad (GMD) menerusi pendekatan “Private-Public Partnership”.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

DARIPADA : TUAN JONATHAN YASIN [RANAU]

TARIKH : 26 NOVEMBER 2018 (ISNIN)

SOALAN NO. 39

Minta **MENTERI PERTANIAN DAN INDUSTRI ASAS TANI** menyatakan Kerajaan Persekutuan telah meluluskan pewujudan Jelapang Padi baharu di Kota Belud Sabah pada tahun 2013. Namun setelah hampir 5 tahun berlalu, pembangunan jelapang tersebut tidak menampak hasil yang diharapkan ekoran salah satunya, peruntukan pembangunan yang disalurkan tidak mencukupi. Maka, apakah tindakan Kerajaan Persekutuan untuk menangani perkara ini dan memastikan objektif asal untuk meningkatkan Tahap Kecukupan Diri beras di Sabah daripada sekitar 30% kepada 60% dapat dicapai.

JAWAPAN

Tuan Yang Dipertua,

Kerajaan memberikan tumpuan utama untuk meningkatkan kemudahan pengairan dan saliran di IADA Kota Belud bagi meningkatkan pengeluaran padi. Di bawah RMKe11, sebanyak 11 projek infrastruktur telah dirancang secara berfasa di mana sehingga kini sebanyak 4 projek infrastruktur telah dan sedang dilaksanakan iaitu:

- (i) Rancangan Pengairan dan Saliran di kawasan Tempasuk Utara - projek telah siap sepenuhnya pada 2 Mei 2018 (100%);
- (ii) Rancangan Pengairan dan Saliran di kawasan Sungai Kesapang dan Sungai Jepun – status fizikal projek 98%;
- (iii) Rancangan Pengairan dan Saliran di kawasan Tawadakan/Tamau – status fizikal projek 73.18%; dan
- (iv) Rancangan Pengairan dan Saliran dari kawasan Sangkir ke Marabau - status fizikal projek 90%.

Projek pembangunan infrastruktur di IADA Kota Belud perlu dilaksanakan secara berfasa dan setiap pakej adalah berkait di antara satu sama lain yang perlu disempurnakan setiap satunya sebagaimana yang telah dirancang. Sasaran untuk mencapai SSL 60% di Sabah akan dapat dicapai setelah semua projek infrastruktur yang dirancang siap pembinaannya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 26 NOVEMBER 2018 [ISNIN]

SOALAN NO. 41

Minta **MENTERI PERUMAHAN DAN KERAJAAN TEMPATAN** menyatakan sama ada Kementerian akan **mengkaji semula syarat sewa PPR** yang memberi sewa kepada ketua keluarga memandangkan banyak ibu tunggal menjadi mangsa apabila ditinggal suami yang didaftarkan sebagai ketua keluarga.

JAWAPAN

Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) ingin menegaskan bahawa hak sewaan unit rumah Program Perumahan Rakyat (PPR) hanya akan **diberikan kepada pemohon yang memenuhi syarat dan kriteria permohonan** PPR yang telah ditetapkan oleh pihak KPKT.
2. Dengan mengambil kira situasi dan keadaan semasa, pihak KPKT sedang mengkaji semula syarat sewaan PPR dengan penambahbaikan antaranya seperti cadangan untuk melaksanakan dua (2) penama iaitu ketua isi rumah dan pasangan di dalam dokumen perjanjian sewaan unit PPR bagi memastikan kepentingan semua pihak terjamin. Penambahbaikan ini akan dilaksanakan di semua PPR di bawah seliaan KPKT dengan kerjasama pihak Kerajaan Negeri.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJAH AZIZAH BINTI
DATUK SERI PANGLIMA HAJI
MOHD DUN
[BEAUFORT]**

TARIKH : 26 NOVEMBER 2018 (ISNIN)

SOALAN NO.42

Minta **MENTERI BELIA DAN SUKAN** menyatakan apakah status terkini kedudukan pegawai, kakitangan tetap dan kontrak dalam Program Latihan Khidmat Negara (PLKN) dan Biro Tata Negara (BTN) setelah kedua-dua agensi dimansuhkan.

JAWAPAN

Yang di-Pertua,

1. Untuk makluman Ahli Yang Berhormat, berkenaan status Pegawai dan Kakitangan JLKN dan BTN, seramai 393 orang pegawai dan kakitangan awam lantikan tetap di JLKN terlibat dalam penstrukturan semula JLKN. Pegawai dan kakitangan ini dalam proses penempatan di kementerian-kementerian dan agensi kerajaan bersesuaian dengan skim perkhidmatan masing-masing. Penjawat awam dari kalangan Angkatan Tentera Malaysia telah dikembalikan kepada Kementerian Pertahanan untuk penempatan semula. Bagi 236 orang pegawai dan kakitangan tetap BTN, mereka akan ditempatkan di bawah Kementerian Belia dan Sukan.
2. Untuk makluman, terdapat seramai 351 pegawai dan kakitangan lantikan kontrak daripada BTN yang sebilangan besar tamat kontrak pada 31 Disember 2019. Manakala terdapat seramai 2,127 orang pegawai dan kakitangan JLKN yang akan tamat kontrak perkhidmatan pada 31 Disember 2018.

Sekian, terima kasih.

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

TARIKH : 26 November 2018
[Isnin]

DARIPADA : YB. Datuk Zahidi bin Zainul Abidin
[Padang Besar]

SOALAN :-

Datuk Zahidi bin Zainul Abidin [Padang Besar] minta **PERDANA MENTERI** menyatakan :-

- (a)berapakah jumlah kerosakan dan kerugian berikutan bencana ribut yang melanda seluruh negeri Perlis baru-baru ini; dan
- (b)adakah Kerajaan akan menggunakan peruntukan kumpulan wang luar jangka bagi membantu memulihkan segala kemusnahan infrastruktur akibat daripada bencana ribut yang melanda negeri Perlis.

**JAWAPAN: YB DATO' SERI DR. WAN AZIZAH WAN ISMAIL,
TIMBALAN PERDANA MENTERI**

Tuan Yang Di-Pertua,

Ribut yang melanda Perlis pada 17 September 2018 telah membawa hujan lebat serta angin kencang selama hampir satu jam sehingga mengakibatkan kerosakan infrastruktur dan tanaman serta kehilangan nyawa seramai tiga orang.

Berkaitan kerosakan infrastruktur, sebanyak 1,096 kes telah dilaporkan. Kerosakan-kerosakan berkenaan melibatkan rumah kediaman, masjid/surau, sekolah harian/sekolah agama, jalan raya serta bangunan pejabat kerajaan. Kerugian keseluruhan telah dianggarkan berjumlah RM1.5 juta, yang mana kerugian terbesar adalah kerosakan sekolah yang dianggarkan sebanyak RM500,000. Di samping itu, tanaman padi seluas 77.1 hektar juga turut terjejas.

Tuan Yang Di-Pertua,

Kementerian dan agensi yang terlibat telah mengambil langkah-langkah yang sewajarnya untuk membaik pulih premis-premis yang mengalami kerosakan tersebut. Kos pembaikan berkaitan menggunakan peruntukan pembangunan sedia ada agensi-agensi terbabit seperti Kementerian Pendidikan, Jabatan Kebajikan Masyarakat dan Jabatan Kerja Raya dan tidak memerlukan peruntukan khusus daripada Kumpulan Wang Amanah Bantuan Bencana Negara (KWABBN).

Dalam pada itu, Kerajaan Pusat melalui peruntukan Kumpulan Wang Amanah Bantuan Bencana Negara (KWABBN) telah memberi bantuan wang ihsan kepada 149 keluarga yang terlibat dengan ribut berkenaan iaitu RM500 bagi setiap keluarga dengan jumlah keseluruhannya RM 74,500.

SOALAN NO. : 44

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : TUAN SANISVARA NETHAJI RAYER A/L RAJAJI
[JELUTONG]**

TARIKH : 26 NOVEMBER 2018 (ISNIN)

SOALAN NO.44

Tuan Sanisvara Nethaji Rayer A/L Rajaji [Jelutong] minta **MENTERI AIR, TANAH DAN SUMBER ASLI** menyatakan bilakah langkah-langkah pendek projek tebatan banjir di sungai, Sungai Pinang Jelutong, Pulau Pinang dijangka dilaksanakan bagi tujuan mengelakkan kejadian banjir di kawasan Datok Keramat, Sungai Pinang dan kawasan parlimen Jelutong secara amnya.

SOALAN NO.44

JAWAPAN:

Tuan Yang di-Pertua,

Langkah jangka pendek yang dilaksanakan bagi mengatasi masalah banjir adalah melalui kerja-kerja penyelenggaraan secara berkala terhadap sistem saliran.

Kerja-kerja penyelenggaraan sistem saliran adalah di bawah tanggungjawab Pihak Berkuasa Tempatan (PBT) dan Kerajaan Negeri. Walau bagaimanapun, Kerajaan Persekutuan juga menyalurkan peruntukan mengikut keutamaan dan kawasan-kawasan yang kritikal berdasarkan permohonan daripada Negeri bagi penyelenggaraan sungai-sungai yang berisiko banjir.

Sekian, terima kasih.

PEMBERITAHUAN PERTANYAAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
DEWAN RAKYAT

PERTANYAAN : LISAN

DARIPADA : DATO' TAKIYUDDIN BIN HASSAN
[KOTA BHARU]

TARIKH : 26 NOVEMBER 2018

SOALAN : 45

Dato' Takiyuddin bin Hassan [Kota Bharu] minta **PERDANA MENTERI** menyatakan apakah opsyen yang akan dilaksanakan oleh Kerajaan sekiranya tidak mempunyai kewangan yang cukup untuk membayar faedah persaraan awam di negara ini.

JAWAPAN: YB TUAN MOHAMED HANIPA BIN MAIDIN

TIMBALAN MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, sehingga ke hari ini, tiada sebarang cadangan untuk memansuhkan pemberian pencen dan pihak Kerajaan tidak akan membuat sebarang bayaran dalam bentuk *one-off* seperti yang dinyatakan.

Walau bagaimanapun, cadangan pelaksanaan Skim Faedah Pencen Bercarum (FPB) telah dibentang dan dibincangkan dalam Mesyuarat Jemaah Menteri pada 15 Jun 2016. Mesyuarat bersetuju Skim FPB dilaksanakan pada satu tarikh yang akan ditetapkan oleh Kerajaan. Skim FPB merupakan skim caruman Kerajaan dan pegawai Kerajaan yang dibuat bersama kepada Kumpulan Wang Persaraan (KWAP) dengan pembahagian kadar caruman yang telah ditetapkan demi memastikan pengurusan pencen sedia ada adalah lebih dinamik dan lestari.

Kerajaan sentiasa mengkaji kaedah terbaik dalam memastikan kedudukan kewangan Negara terpelihara dan pada masa sama kelangsungan pembayaran pencen kepada pesara Kerajaan berterusan. Banyak dasar telah ditambahbaik ke arah memastikan pemberian faedah persaraan kepada penjawat awam sentiasa mematuhi Perkara 147 Perlembagaan Persekutuan iaitu Perlindungan Hak-hak Pencen.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK MOHAMED ABDUH NIK ABDUL
AZIZ [BACHOK]**

TARIKH : 26 NOVEMBER 2018 (ISNIN)

SOALAN NO. 46

Minta **MENTERI PERTANIAN DAN INDUSTRI ASAS TANI** menyatakan kegunaan tanah sawah dan penghasilannya kepada pengeluaran padi di Bachok melalui projek IADA Kemasin Semarak.

JAWAPAN

Tuan Yang Dipertua,

Kawasan tanaman padi bagi IADA Kemasin Semarak hanya melibatkan dua (2) kawasan iaitu Bachok dan Pasir Puteh. Kegunaan utama tanah sawah di Bachok adalah untuk tujuan penanaman padi. Sebanyak RM1.925 juta telah diperuntukkan pada tahun 2018 untuk meningkatkan pengeluaran hasil padi di kawasan IADA Kemasin Semarak. Bagi tahun 2017, data awalan menunjukkan IADA Kemasin Semarak telah berjaya mengeluarkan sekitar 51,000 m.t padi.

Sekian, terima kasih.